

四庫全書

經部

欽定四庫全書

春秋傳卷十七

宋 胡安國 撰

宣公中

已定王七年晉成五齊惠七衛成三十三蔡文十鄭襄
未五年三曹文十六陳靈十二杞桓三十五宋文
九秦桓三
楚莊十二

春衛侯使孫良夫來盟

來盟為前定者嘗有約言矣未足効信而釋疑又相
歎血固結之爾是盟衛欲為晉致魯而魯專事齊初
未與晉通也必有疑焉而衛侯任其無咎故遣良夫
來為此盟而公卒見辱盟非春秋之所貴義自見矣

夏公會齊侯伐萊音註

萊東方小國

秋公至自伐萊大旱

及者內為志會者外為主平莒及邾公所欲也故書
及繼以取向即所欲者可知矣伐萊齊志也故書會
繼以伐致即師行之危亦可知矣公與齊侯俱不務
德合黨連兵恃強陵弱是以為此舉也軍旅之後必
有凶年言民以征役怨咨之氣感動天變而旱乾作
矣其以大旱書者或不雩或雖雩而不雨也不雩則
無恤民憂國之心雩而不雨格天之精意闕矣

冬公會晉侯宋公衛侯鄭伯曹伯于黑壤音註

黑壤晉地一名

父黃

會而不得見不以不得見為諱盟而不與盟不以不與盟為諱則曲不在公而主會盟者之罪耳與於會不與於盟而公有歟焉非主會盟者之過也則書會不書盟若黑壤是也晉侯之立公既不朝又不使大夫聘而每歲適齊是宣公行有不憚于心而非晉人之咎矣凡不直者臣為君隱子為父隱於以養臣子之敬之心而不事盟主又音註與音預並

以賂免則不直在已矣

又音註

與音預並

同朝音潮

庚定王八年

晉成六齊惠八衛成三十四蔡文十一鄭襄四曹文十七陳靈十三杞桓三十六宋

文十秦桓四

楚莊十三

春公至自會

夏六月公子遂如齊至黃乃復音註

黃齊地

至黃乃復壅君命也有疾亦不復可乎大夫以君命
出聞喪徐行而不返未致事而死以尸將事楚伐吳
陳侯使公孫貞子往弔及良而卒將以尸入吳人辭
焉上介芋尹蓋曰寡君使蓋備使弔君之下吏無祿
使人逢天之感大命隕墜絕世于良廢日供積一日
遷次今君命逆使人曰無以尸造于門是我寡君之
命委于草莽也無乃不可乎吳人不敢辭君子音註
以為知禮乃者無其上之詞其曰復事未畢也音註
使去聲
並同

辛巳有事于大廟仲遂卒于垂音註

大音泰
垂齊地

有事言時祭此公子遂也曷為書字生而賜氏俾世
其官也曷為書卒以事之變卒之也古者諸侯立家
大夫卒而賜氏其後尊禮權臣寵遇貴戚而不由其
道於是乎有生而賜氏其在魯則季友仲遂是也襄

仲殺惡及視援立宣公而宣公深德之故生而賜氏
使世大夫以答之也經於其卒書族以志變法之端
為後世戒

壬午猶繹萬人去籥音註

去起呂反
籥羊畧反

繹者祭之明日以賓尸也猶者可以已之詞萬舞也以其無聲也故入而遂用籥管也以其有聲也故去而不作是謂故知不可存其邪心而不能格也禮大夫卒當祭則不告終事而聞則不繹不告者盡肅敬之誠於宗廟不繹者全始終之恩於臣子今仲遂國卿也卒而猶繹則失寵遇大臣之禮矣春秋雖隆君抑臣而體貌有加焉則廡陞益尊而臣節礪後世法家專欲隆君而不得其道至於犬馬國人相視大倫滅矣聖人書法如此存君臣之義也

戊子夫人嬴氏薨音註嬴氏宣

公母也

敬嬴文公妾也何以稱夫人自成風聞季友之繇事友而屬其子及僖公得國立以為夫人於是乎嫡妾亂矣春秋於風氏凡始卒四貶之則禘于太廟秦人歸襚榮叔舍賵名伯會葬去其姓氏不稱夫人王再書而無天是也敬嬴又嬖私事襄仲而屬宣公不待致于太廟援例以立則從同同而無貶矣其意若曰以義起禮為可繼苟出於私音註繇直情而非義後雖欲正可若何音註繇反

晉師白狄伐秦音註白狄始

見經

晉主夏盟糾合諸侯尊周室安諸夏乃其職矣秦人之怨起自侵崇其曲在晉責已可也既不知自反釋怨修睦以補前過已可咎矣乃復興師動眾會戎狄以伐之獨不惡傷其類乎直書于策貶自見矣

楚人滅舒蓼音註

舒蓼二國名地譜上義陽之蓼先已滅於楚此即如舒鳩舒庸蓋羣舒別

種非二國也

按詩稱戎狄是膺荆舒是懲在周公所懲者真自相攻滅中國何與焉然春秋書而不削者是時楚人疆舒蓼及滑汭盟吳越勢益強大將為中國憂而諸侯人抱漢陽之戚矣經斯世者當以為懼有攘却之謀而不可忽則聖人之意也

秋七月甲子日有食之既

冬十月己丑葬我小君敬嬴音註

敬嬴敬諡嬴姓也

成風薨以夫人葬以小君將祔于廟而始有二夫人也則四貶之以正其事今敬嬴亦薨以夫人葬以小

君使祔于廟無貶以正之從同同可也而於宣公元年即以所逆穆姜婦之何也曰婦有姑之詞見敬嬴遂以子貴援例而亟立為夫人也僖公享國八年然後致成風而敬嬴之亟也雖云援例魯君臣之責亦可知矣無貶而書法若此者音註祔音猶桓宣弒君而書即位爾附

雨不克葬庚寅日中而克葬

敬嬴以其子宣公屬諸襄仲殺太子及其母弟雖假手于仲實敬嬴之謀也經書子亦卒夫人姜氏歸于齊其文無貶而讀者有傷切之意焉則以秉彝不可滅也傳謂哭而過市市人皆哭敬嬴逆天理拂人心之狀慘矣其於終事雨不克葬著咎徵焉而謂無天道乎此皆直書以見人心與天理之不可誣者也夫喪事即遠有進無退浴于中雷飯于牖下小斂于戶內大斂于阼階殯于客位遷于廟祖于庭壙于墓以

弔賓則其退有節以虞事則其祭有時不為雨止禮也雨不克葬喪不以制也或曰卜葬先遠日所以避不懷也諸侯相朝與旅見天子入門而雨霑服失容則廢刼送終大事人情所不忍遽者反可冒雨不待成禮而葬乎潦車載蓑笠士喪禮也有國家者乃不能為雨備何也且公庭之於墓次其禮意固不同矣不得不可以為悅無財不可以為悅得之為有財古之人皆用焉而不能為之備是儉其親也不亦薄乎故穀梁子曰雨不克葬喪不以制也厚葬古人之所戒而墨之治喪也以薄又君子之所不與故喪事以制春秋音註霑力救反崩通之旨也音註鄧反下棺也

城平陽音註

今泰山有平陽縣

楚師伐陳

辛定王九年晉成七年齊惠公九年衛成三十五年蔡文
酉七年鄭襄五年曹文十八陳靈十四杞桓三
十七宋文十一秦
桓五楚莊十四

春王正月公如齊公至自齊

夏仲孫蔑如京師

以淺言之屬辭比事春秋教也當歲首月公朝于齊
夏使大夫聘于京師此皆比事可攷不待貶絕而惡
自見者也宣公享國九年於周纔一往聘其在齊則
又再朝矣經於如齊每行必致深罪之也下逮戰國
周衰甚矣齊威王往朝于周而天下皆賢之況春秋
時乎而宣公不能也故聘覲之禮廢則君臣之位失
諸侯之行惡而倍畔侵陵之敗起矣此經書君
如齊臣如周之意而特書王正月以表之也

齊師伐萊音註

萊從齊之小國

秋取根牟音註

東夷國也取言公不言公非公命也自宣而下征伐在大夫矣

八月滕子卒音註

昭公卒文公立

九月晉侯宋公衛侯鄭伯曹伯會于扈晉荀林父帥師

伐陳音註

扈鄭地

按左氏討不睦也陳侯不會荀林父以諸侯之師伐陳晉侯卒乃還則知經所書者與晉罪陳之詞也會于扈以待陳而陳侯不會然後林父以諸侯之師伐之也則幾於自反而有禮矣不書諸侯之師而曰林父帥師者在會諸侯皆以師聽命而林父兼將之也則其衆輯矣晉主夏盟又嘗救陳所宜與也而惟楚

之即夫
宜義乎

辛酉晉侯黑臀卒于扈音註

成公卒子
景公孺立

冬十月癸酉衛侯鄭卒音註

成公卒子
穆公速立

晉成公何以不葬魯不葬也衛成公何以不葬亦魯
不葬也衛成事晉甚謹而魯宣公獨深向齊衛欲為
晉致魯故謀黑壤而晉人止公賂然後免是以扈之會
也及會于黑壤而晉人止公賂然後免是以扈之會
皆前日諸侯而魯獨不往二國繼以喪赴亦皆不
此所謂無其事而闕其文者也或曰二君皆有貶焉
故不書葬誤矣魯人不葬亦無貶于書卒而以私怨
廢禮忘親其罪已見春秋文簡而直視人若日月之
無私照也曲生音註為去聲
意義失之遠矣音註見音現

宋人圍滕

圍國非將卑師少所能辦也必動大衆而使大夫為主帥明矣然而稱人是貶之也滕既小國又方有喪所宜矜哀弔恤之不暇而用兵草以圍

音註將去聲
比音彼

楚子伐鄭晉卻缺帥師救鄭

楚兵加鄭數矣或稱人或稱爵何也鄭自晉成公初立舍楚而從中國正也楚人為是興師而加鄭不義矣故宣公三年書人書侵罪之也次年鄭公子歸生弑其君諸侯未有聲罪致討者而楚師至焉故特書爵與之也然興師動衆賊則不討惟服鄭之為事則非義舉矣故又次年傳稱楚子伐鄭而經書人再貶之也至是稱爵豈與之乎按公羊例君將不言帥師書其重者也至此書爵見其陵暴諸侯以重兵臨鄭

矣何以知其非與之乎曰下書晉卻缺帥師救鄭則知其非與之也由此觀春秋書法皆欲治亂賊之黨謹內外之辨以一字為褒貶深切著明矣

陳殺其大夫洩冶音註

洩音泄治音也

稱國以殺者君與用事大臣同殺之也稱其大夫則不失官守而殺之者有專輒之罪矣洩冶無罪而書之名何也治以諫殺身者也殺諫臣者必有亡國弑君之禍故書其名為徵舒弑君楚子滅陳之端以垂後戒此所謂義係於名而書其名者也此干諫而死子曰商有三仁焉洩冶諫而死何獨無褒詞夫語默死生當其可而止爾洩冶之盡言無隱不愧乎史魚之直矣方諸比干自靖自獻于先王則未可同日而語也治雖效忠其猶在宋子哀魯叔肝之後乎故仕於昏亂之朝若異姓者如子哀潔身而去可也其貴戚

耶不食其祿音註當去
如叔肝善矣

壬定王十年晉景公獮元年齊惠十年衛穆公速元年
戌八年蔡文十三鄭襄六曹文十九陳靈十五
杞桓三十八宋文十
二秦桓六楚莊十五

春公如齊公至自齊

此亦如齊亦致其至而不書月上九年亦如齊亦致其至而書月者為是年夏使仲孫蔑如京師故特於歲首書王正月以著宣公之罪而君臣名分之際謹嚴如此也歸田以為私惠比於君臣名分之際則大小不侔矣

齊人歸我濟西田

宣公於齊順其所欲既以女妻其臣又以兵會伐萊之舉又每歲往朝于齊廷雖諸侯事天子無是禮也故惠公悅其能順事已而以所取濟西田歸之也歸謹及闡直書曰歸此獨書我者乃相親愛惠遺之意深著齊人助成弑逆之罪也或謂濟西魯之本封故書我則誤矣以柔巽卑屈事人不以其道而得地與悅人之柔巽卑屈事已不以其道而歸其地皆人欲之私而非義矣

夏四月丙辰日有食之

己巳齊侯元卒

音註惠公卒子頃公立

齊崔氏出奔衛

音註崔氏謂齊大夫崔杼

按左氏崔杼有寵於惠公高國畏其逼也公卒而逐之奔衛書曰崔氏以族奔也許翰以謂崔杼出而能

反反而能弑者以其宗彊於此舉氏辨之早也其說得矣所謂譏世卿者非公羊本旨蓋門弟子因尹氏武氏稱世卿而附益之於此爾經有事同而詞異亦有事異而詞同一視之則泥而不通矣
音註

泥去聲

公如齊音註

魯朝於齊止此

五月公至自齊

文約而事詳者經也春如齊朝惠公夏如齊奔其喪若是雖不致可也而皆致者甚之也天王之喪不奔欲行郊禮而汲汲於奔齊惠公之喪天王之葬不會使微者往而公孫歸父會齊惠公之葬其不顧君臣上下尊卑之等所謂肆人欲滅天理而無忌憚者也詞繁而不殺聖人之情見矣

癸巳陳夏徵舒弑其君平國音註

靈公弑子成公午立

陳靈公之無道也而稱大夫之名氏以弑何也禍莫大於拒諫而殺直臣忠莫顯於身見殺而其言驗洩治所為不憚斧鉞盡言於其君者正謂靈公君臣通於夏徵舒之家恐其及禍不忍坐觀故昧死言之靈公不能納又從而殺之卒以見弑而亡其國此萬世之大戒也特書徵舒之名氏以見洩治忠言之驗靈公見弑之由使有國者必以遠色修身包容狂直開納諫諍為心也以為罪不及民故稱大夫以弑者非經意矣

六月宋師伐滕

前圍滕稱人刺伐喪也此伐滕稱師譏用衆也宋大國爵上公霸主之餘業力非不足也今鄰有弑逆不

能聲罪致討乃用大衆以伐所當矜恤之小邦且滕
不事已無乃已德猶有所闕而滕何尤焉故特稱師
以著其罪而汲汲於誅
亂臣討賊子之意見矣

公孫歸父如齊葬齊惠公

歸父仲遂之子貴而有寵宣公深德齊侯之能定其
位而又以濟西田歸之也故生則傾身以事之而不
辭於屈辱沒則親往奔喪而使貴卿會其葬亦不
顧天王之禮闕然莫之供也比事考察辭義自見矣

晉人宋人衛人曹人伐鄭

按左氏鄭及楚平諸侯伐鄭取成而還其稱人貶也
鄭居大國之間從於疆令豈其罪乎不能以德鎮撫
而用力爭之是謂五十步笑百步庸
何愈於楚自是責楚益輕罪在晉矣

秋天王使王季子來聘音註

王季子即劉康公周聘止此

公羊傳曰王季子者王之母弟也王有時聘以結諸侯之好禮也宣公享國至是十年不朝于周而比年朝齊不奔王喪而奔齊侯喪不遣貴卿會匡王葬而使歸父會齊侯之葬縱未舉法勿聘焉猶可也而使王季子來王靈益不震矣自是王聘春秋亦不書矣

公孫歸父帥師伐邾取繹音註

繹邾邑宣公而下征伐在大夫故自取繹凡

取皆不書其人自伐杞凡伐皆不書公

用貴卿為主將舉大衆出征伐不施於亂臣賊子奉天討罪而陵弱侵小近在邦域之中附庸之國是為盜也當此時陳有弑君之亂既來赴告藏在諸侯之策矣曾不是圖而有事於邾不亦慎乎故四國伐鄭

貶而稱人魯人伐邾音註將去聲
特書取繹以罪之也音註慎音顛

大水

季孫行父如齊

冬公孫歸父如齊音註宣公聘齊止此

按左氏行父如齊初聘也歸父如齊邾故也齊侯嗣立宣公親往奔其父喪又使貴卿會葬矣若待邇年然後修聘未晚也而季孫亟行歸父繼往則以宣公君臣不知為國以禮而謂妄說取人可以免於討也歸父貪於取繹畏齊而往蓋理曲則氣必餒矣能無畏乎哉春秋備書而不削以著其罪為後世鑒也

齊侯使國佐來聘音註國佐即國武子齊魯之交自此疎矣

葬之速也太不懷也又未逾年而以君命遣使聘於鄰國則哀戚之情忘矣孟子曰養生不足以當大事惟送死可以當大事滕文公五月居廬未有命戒及至葬顏色之戚哭泣之哀弔者大悅而有願為其氓者蓋禮義人心之所同然也齊頃公嗣位之初舉動如此喪師失地幾見執獲豈特婦人笑客之罪哉已失守身之本矣

饑

楚子伐鄭

經有詞同而意異者比事以觀斯得之矣九年楚子伐鄭稱爵者貶詞也若曰國君自將恃強壓弱憑陵中夏之稱也知然者以下書晉卻缺帥師救鄭則取楚可知矣此年楚子伐鄭稱爵者直辭也若曰以實

屬詞書其重者而意不以楚為罪也知然者以傳書
晉士會救鄭逐楚師于潁北而經削之則責晉可知
矣此類無以傳為案者也

癸定王九年

十有一年

晉景二齊頃公無野元年衛穆二蔡
文十四鄭襄七曹文二十陳成公午

元十三年

杞桓三十九宋文
秦桓七楚莊十六

春王正月

夏楚子陳侯鄭伯盟于辰陵音註

辰陵陳地序楚子
於陳侯鄭伯之上初

予楚莊
以伯也

晉楚爭此二國為日久矣今陳鄭背晉從楚盟于辰
陵而春秋書之無貶詞者豈與其下喬木入幽谷乎

中國不能令則荆楚進矣經之大法在誅亂臣討賊
子有亂臣則無君有賊子則無父無父無君則天下
相率而為寇賊不可以治雖得天下不能一朝居也
今魯與齊方用兵伐莒晉與狄方會于欒函而不謀
少西氏之逆也而楚人能謀之所謂禮失而求之野
楚雖僻處南服猶以禮自守也辰陵之盟所以得書
於經而詞無貶乎聖人討音註背音
賊之意可謂深切著明矣音註珮

公孫歸父會齊人伐莒

秋晉侯會狄于欒函音註

欒函狄地欒才端反函音咸
楚方倡義於天下而晉攻

狄于羣狄至往
會焉晉卑甚矣

春秋正法不與夷狄會同分類也書會我會狄會吳
皆外詞也內中國故詳外夷狄故畧今中國有亂天

主不能討則方伯之責也又不能討則四鄰諸侯宜有請矣而魯方會齊伐莒晉方求成于狄是失肩背而養其一指不能三年而總小功之察不亦僨乎凡此直書其事不待貶絕而義自見者也

冬十月楚人殺陳夏徵舒音註不言楚子而稱人討賊

之也

丁亥楚子入陳音註

楚入國書爵始此先書殺後書入予楚以討賊之義也不以利陳

累莊王也

稱人者衆詞也大惡人人之所同惡人人之所得討其稱楚人殺徵舒諸夏之罪自見矣按左氏傳楚子為夏氏亂故謂陳人無動將討於少西氏遂入陳殺徵舒輟諸栗門而經先書殺後書入者與楚子之能

討賊故先之也。討其賊為義，取其國為貪。舜跖之相去遠矣，其分乃在於善與利耳。楚莊以義討賊，勇於為善，舜之徒也。以貪取國，急於為利，跖之徒矣。為善與惡，特在一念。須臾之間，而書法如此。故春秋傳心之要，曲不可以不察者也。或曰：聖人大改過，楚雖縣陳，能聽申叔時之說而復封陳，可謂能改過矣。猶書入陳以貶之，何也？曰：楚莊意在滅陳，雖復封之，然鄉取一人焉，以歸謂之夏州，而又納其亂臣，是制人之上下，使不得其君臣之道也。晉人以幣如鄭，問驂乞之，立故子產對曰：「若寡君之二三臣而晉大夫專制其位，是晉之縣鄙也。何國之為辭客幣而報其使？晉人舍之，他國非所當與也。而必欲納其亂臣存亡興滅，其若是乎？」仲尼重傷中國深美其有討賊之功，音故特從未減，不稱取陳而書入，雖曰與之可矣。

註辭客幣而報其使晉人舍之事見左傳昭公十九年

納公孫寧儀行父于陳

此二臣者從君于昏宣淫于朝誅殺諫臣使其君見弑蓋致亂之臣也肆諸市朝與衆同棄然後快於人心今乃詭辭弁楚託於討賊復讎以自脫其罪而楚莊不能察其反覆又使陳人用之是猶人有飲毒而死者幸而復生又彊以毒飲之可乎故聖人外此二人於陳而特書曰納納者不受而彊納之者也為楚莊者宜柰何諸音溺徵舒之官封洩冶之墓尸孔寧音註儀行父于朝謀於陳衆定其君而去其庶幾乎

春秋傳卷十七

欽定四庫全書

春秋傳卷十八

宋 胡安國 撰

宣公下

甲定王十有二年

晉景三齊頃二衛穆三蔡文十五鄭襄八曹文二十一陳成二杞桓四十

宋文十四秦桓八楚莊十七

春葬陳靈公

討賊者非臣子也何以書葬天下之惡一也本國臣子或不能討而上有天王下有方伯又其次有四鄰有同盟有方域之諸侯有四夷之君長與凡民皆得而討之所以明大倫存天理也徵舒雖楚討之陳之

臣子亦可以釋怨矣
故得書葬君子詞也

楚子圍鄭

按公羊傳例戰不言伐圍不言戰入不言圍滅不言入書其重者楚子縣陳蓋滅之矣而經止書入其於鄭也入自皇門至於遠道蓋即其國都矣而經止書圍曷為悉從輕典不著其憑陵諸夏之罪乎上無天王下無方伯天下諸侯有臣弑君子弑父諸夏不能討而楚子能討之春秋取大節畧小過雖如楚子憑陵上國近造王都之側猶從末減於以音註達道左見誅亂臣討賊子正大倫之為重也

路公羊
作路衢

夏六月乙卯晉荀林父帥師及楚子戰于邲晉師敗績

音註

邲鄭地也一音必又音弼

戰而言及主乎是戰者也按左氏晉師救鄭經既不
以救鄭書矣又不言楚晉戰于邲而使晉主之何也
陳人弑君晉不討賊而楚能討之楚人圍鄭亦既退
師與鄭平矣而又與之戰則非觀釁之師也故釋楚
不貶而使晉主之獨與常詞異乎按邲之役六卿並
在大夫司馬皆具官不欲勦民者三帥也違命濟師
者先穀也而獨罪林父何也尊無二上定于一也古
者仗鉞臨戎專制閭外雖君令有所不受況其屬乎
藥書救鄭軍帥之欲戰者八人武子遂還衆不敢遏
偃陽之舉句偃二將皆請班師荀彘令曰七日不克
必爾乎取之遂下偃陽林父既知無及於鄭焉用之
矣諸帥又皆信然其策先穀若獨以中軍佐濟者下
令三軍無得妄動按軍法而行辟夫豈不可既不能
令乃畏失屬亡師之罪而從韓獻子分惡之言知難

而冒進是棄晉師於誰責乎故後誅先穀音註樂書
不去其官此稱敗績特以林父主之也救鄭
軍師之欲戰者八人武子遂還衆不敢過事見左傳
成公六年偃陽之舉句偃二將皆請班師荀營令曰
七日不克必爾乎取之遂下
偃陽事見左傳襄公十年

秋七月

冬十有二月戊寅楚子滅蕭音註

蕭宋附庸國

假於討賊而滅陳春秋以討賊之義重也末滅而書
入惡其貳已而入鄭春秋以退師之情恕也末滅而
書圍與人為善之德宏矣至是肆其強暴滅無罪之
國其志已盈雖欲赦之不得也故傳稱蕭潰經以滅
書斷其罪也孟子曰以力假仁者伯伯也建萬國親諸
莊蓋以力假仁不能久假而遽歸者也建萬國親諸

侯者先王之政興滅國繼絕世者仲尼之法今乃滅
人社稷而絕其祀亦不仁甚矣蕭既滅亡必無赴者
何以得書于魯史楚莊縣陳入鄭大敗晉師于郟莫
與校者不知以禮制心至於驕溢克伐怨欲皆得行
焉遂以滅蕭告赴諸侯矜其威力以恐中國耳孟子
定其功罪以五伯為三王之罪人春秋史外傳心之
要典推此類求之斯得矣

晉人宋人衛人曹人同盟于清丘音註

清丘衛地書人同盟猶曰人

自為盟也書法如惡曹
庶上中國又無伯也

書同盟志同欲也或以惡其反覆而書同盟非也春
秋不貴盟誓自隱公始年書儀父盟蔑宋人盟宿已
不實言矣奚待清丘然後惡其反覆乎清丘載書恤
病討貳口血未乾敗其盟好所謂不待貶而惡見者

也又奚必人諸國之卿然後知反覆之可罪乎楚既入陳圍鄭大敗晉師伐蕭滅之憑陵中國甚矣為諸侯計者宜信任仁賢修明政事自強於為善則可以保其國耳曾不是圖而刑牲歆血要質鬼神斲以禦楚謀之不臧孰大於是故國卿貶而稱人譏失職也原穀違命喪師乃晉國罪人而主茲盟約所信任者皆可音註斲音祈知矣

宋師伐陳衛人救陳

陳有弑君之亂宋不能討而楚能討之雖曰縣陳尋復封之其德於楚而不能貳未足責也宋人不能內自省德遽以大衆伐之非義舉矣衛人救陳背盟失信而以救書者見宋師非義陳未有罪而受兵為可恤也且謀國失圖妄興師旅無休息之期則亂益滋矣其以救書意在責宋也若衛叛盟則不待貶絕而惡

自見
矣

乙定王十
十有三年
晉景四齊頃三衛穆四蔡文十六
鄭襄九曹文二十二陳成三杞桓

四十一
宋文十五
秦桓九
楚莊十八

春齊師伐莒

夏楚子伐宋

楚人滅蕭將以脅宋諸侯懼而同盟為宋人計者恤
民固本輕徭薄賦使民效死親其上則可以待敵矣
計不出此而急於伐陳攻楚與國非
策也故楚人有詞于伐而得書爵

秋螽

冬晉殺其大夫先穀

音註書名以

先穀違命大敗晉師元帥不能用鉞已失刑矣今又重有罪焉晉人治其罪而戮之義也曷為稱國以殺而不去其官夫兵者安危所繫有國之大事也將非其人則敗雖得其人使親信間之則敗以剛愎不仁者參焉而莫肯用命則敗凡此三敗君之過也河曲之戰趙穿獨出而更駢之謀不用濟涇而次藥驪欲東而荀偃之令不行今林父初將中軍乃以先穀佐之使敵國謀臣知其從政者新未能行令誰之過歟故稱國以殺不去音註之謀不用事見左傳文公十其官罪累上也

二年濟涇而次藥驪欲東而荀偃之令不行事見左傳襄公十四年驪於斬反

丙定王十

十有四年

晉景五齊頃四衛穆五蔡文十七鄭襄十曹文二十三卒陳成四杞

桓四十二宋文十六
秦桓十楚莊十九

春衛殺其大夫孔達

殺大夫而書名氏義不繫於專殺也孔達棄信以危社稷衛人按其罪而誅之可也何以稱國而不去其官用人謀國干犯盟主至於見討誰之過歟稱國以殺不去其官罪累上也春秋端本清源故書法如此

夏五月壬申曹伯壽卒

音註
宣公廬立

晉侯伐鄭

按左氏傳為邲故也比事以觀知其為報怨復
音註
讐之兵詞無所貶者直書其事而義自見矣
現見音

秋九月楚子圍宋

宋人要結盟誓欲以禦楚已非持國之道輕舉大衆
勦民妄動又非恤患之兵持書救陳以著其罪明見
伐之由也國必自伐然後人伐之凡事其作始也簡
其將畢也必巨易於訟卦曰君子以作事謀始始而
不謀必至於訟訟而不竟必至於師若宋是矣始謀
不臧至於見伐見圍幾亡其國則自取之也春秋端
本故責宋為深若蠻夷圍中國則亦明矣

葬曹文公

冬公孫歸父會齊侯于穀

夫禮別嫌明微致治於未亂自天子出者也列國之
君非王事而自相會聚是禮自諸侯出矣以國君而

降班失列下與外臣會以外臣而抗尊出位上與諸
侯會是禮自大夫出矣君若贅旒陪臣執命豈一朝
一夕之故其所由來漸矣故易於坤之初六曰馴致
其道至堅冰也易言其理春秋見諸行事若合符節
可謂深切
著明矣

丁定王十

十有五年

晉景六齊頃五衛穆六蔡文十八
鄭襄十一曹宣公廬元年陳成五

杞桓四十三宋文十七
秦桓十一楚莊二十

春公孫歸父會楚子於宋音註

魯大夫始
特會楚

楚子不假道于宋以啟釁端而圍之陵蔑中華甚矣
諸侯縱不能畏簡書攘夷狄存先代之後嚴兵固圉
以為聲援猶之可也乃以周公之裔千乘之國謀其
不免至於薦賄不亦鄙乎若此類聖人不徒筆之於

經也比事以觀則知天下不可音註此去聲

一日無是春秋經世之畧矣

夏五月宋人及楚人平音註凡平不書必關天下之故

宣十年鄭平不書僖二十四年宋嘗及楚平矣不書必莊王得宋天下將有南北之勢始書之

此華元子反二國之卿其稱人何貶也春秋賤欺詐惡侵伐二卿不愛其情釋怨解紛使宋無亡國之憂

楚無滅國之罪功亦大矣宜在所褒何以貶也善則稱君過則稱己則民作忠今二卿自以情實私相告

語取必於上以成平國之功而其君不預知焉非人臣之義也世衰道微暴行交作君有聽於臣父有聽

於子夫有聽於婦去順効逆此仲尼之所為懼春秋所以作也故平以解紛雖其所欲而平者在下則

大倫紊矣聖人明其道不計其功故褒貶如此然則臣而有安國家利社稷者專之不可乎曰專之而可

者謂境外也子反在君之側無奏報之難幾會之失
奚急於平而專之若是哉或曰子反攘善則知其罪
矣華元救國急難而紓其情實何尤焉夫宋先代之
後武王所封以備三恪橫見侵侮非有可滅之罪也
若以大義責之曰子為上卿不能恤小助桀為虐陵
我郊保圍我城郭欲滅我社稷縱子得之何面目見
中華之士乎使子反果忠楚莊果賢必為義動退師
止衆結盟而反矣何必輕見情實蹈不測之險乎後
世羊陸放其所為交歡邊境而議者以為非純臣也知春秋之法矣

六月癸卯晉師滅赤狄潞氏以潞子嬰兒歸音註潞赤

別號潞氏國故稱氏子爵也

其稱日謹之也上卿為主將畧而稱師者著其暴也
滅而舉號及氏者滅見滅之罪著滅者之甚不仁也

潞嬰兒不死社稷比於中國而書爵者免嬰兒之責
詞也然則攘夷狄安諸夏非耶徐夷並興東郊不開
伯禽征之獫狁孔熾侵鎬及方宣王伐之楚人侵鄭
近在王畿齊侯攘之皆門庭之寇不可縱而莫禦者
也雖禦之亦不極其兵力殄滅之無遺育也今亦狄
未嘗侵掠晉境非門庭之寇而恃強暴以滅之其不
仁甚矣春秋所以責晉而畧狄也又有異焉者夫伐
國之要討其罪人斯止矣按左氏潞子夫人晉景公
之姊也酆舒為政而殺之又傷潞子之目則酆舒者
罪之在也為晉計者執酆舒輟諸市立黎侯安定潞
子改紀其政而返則諸狄服疆域安矣今乃利狄之
土滅潞氏以其君歸何義乎春秋所以責晉而畧狄
也

音註

徐夷並興東郊不開伯禽征之見書費誓獫狁孔熾侵鎬及方宣王伐之見詩小雅六月

鎬合老反
輟音患

秦人伐晉

王札子殺召伯毛伯

音註

召音

王臣有書字而言子者王季子是也有書子而繫名者王季子虎是也此稱王札子者殺梁以為當上之詞也其為當上之詞者矯王命以殺之也為天下主者天也繼天者君也君之所司者命也為人臣而侵其君之命則不臣為人君而假其臣以命則不君臣不臣天下所以傾也邢侯專殺雍子於朝叔向以殺人不忌為賊請施邢侯君子於朝叔向以為義事見左傳國而不音註邢侯專殺雍子於朝叔向以為義事見左傳替乎音註為賊請施邢侯君子以為義事見左傳昭公十四年朝音潮

秋螽

人事感於此則物變應於彼宣公為國虛內以事外
去實而務華煩於朝會聘問賂遺之末而不知務其
本者也故戾氣應之六年螽七年旱十年大水十有
三年又螽十有五年復螽府庫匱倉廩竭調度不給
而言利剋民之事起矣

仲孫蔑會齊高固于無婁音註

無婁杞邑

禮之始失也諸侯非王事而自相會也無以正之不
自天子出矣然後諸侯與大夫會又無以正之然後
大夫與大夫會禮亦不自諸侯出矣田氏篡齊六卿
分晉三家專魯理固然也不能辨於早雖欲正之其
將能音註諸侯與大夫會詳見文公八年會戚註大
乎夫與大夫會詳見文公八年盟衛雍註大

初稅畝

孟子曰耕者助而不稅則天下之農皆悅而願耕於其野矣書初稅畝者譏宣公廢助法而用稅也殷制公田為助助者藉也周因其法為徹徹者通也其實皆什一也古者上下相親上之於下則曰駿發爾私終三十里惟恐民食之不給也下之於上則曰雨我公田遂及我私惟恐公田之不善也故助法行而頌聲作矣世衰道微上下交惡民惟私家之利而不竭力以奉公上惟邦賦之入而不惻怛以利下水旱凶災相繼而起公田之入薄矣所以廢助法而稅畝乎初者志變法之始也其後作丘甲用田賦至於二猶不足則皆宣公啟之也故曰作法於涼其弊猶貪作法於貪弊將若何有國家者必欲克守成法而不變其必先務本乎

冬蛭生音註

蛭音緣
又音院

始生曰蛭既大曰蝥秋蝥未息冬又生子災重及民也而詳志之如此者急民事謹天災仁人之心王者之務也遇天災而不懼忽民事而不修而又為繁政重賦以感之國之危無日矣

饑

春秋饑歲多矣書于經者三而宣公獨有其二何也古者三年耕餘一年之畜九年耕餘三年之食雖有凶旱民無菜色是歲雖蝥而遽至於饑者宣公為國務華去實虛內事外煩於朝會聘問賂遺之末而不敢其本府庫竭矣倉廩匱矣水旱蝥蛭天降饑饉亦無以賑業貧乏矣經所以獨兩書饑以示後世為國之不可不取本也

戊定王十
辰四年十有六年
晉景七齊頃六衛穆七蔡文十九鄭襄十二曹宣二陳成六杞桓四

十四宋文十八秦桓
十二楚莊二十一

春王正月晉人滅赤狄甲氏及留吁

按左氏董是役者士會也上將主兵其稱人貶詞也甲氏潞之遺種留吁其殘邑也王者有並生之心但不使其侵擾則止矣伯禽征徐夷東郊既開而止宣王伐玁狁至於太原而止武侯征戎廬服其渠帥而止必欲盡殄滅之無遺種豈仁人之心音註甲氏留王者之事乎士會所以貶而稱人也

夏成周宣榭火

成周天子之東都宣榭宣王之廟也按呂大臨考古圖有邠敦者稱王格于宣榭呼內史策命邠是知宣榭者宣王之廟也古者爵有德祿有功必於太廟示不敢專也榭者射堂之制其堂無室以便射事故凡無室者皆謂之榭宣王之廟謂之榭者其廟制如榭也宣榭火何以書以宗廟之重書之也貴戚擅殺大臣而天子不討王室不復能中音註呂大臨藍田人興矣人火之天所以見戒乎

弟邠皮應
反敦音對

秋邠伯姬來歸

按左氏邠伯姬來歸出也內女出書之策者男女居室人之大倫也婚姻之禮廢則夫婦之道苦淫辟之罪多矣復相棄背喪其配耦氓之詩所以刺衛日以衰薄室家相棄中谷有推所以閔周易叙咸恒為下

經首春秋內女出夫人歸凡男女之際詳書于策所以正人倫之本也其旨微矣

冬大有年音註

穀大有年謂五穀大熟也

程氏曰大有年記異也旱乾水溢饑饉荐臻者災也山崩地震彗孛飛流者異也景星甘露醴泉芝草百穀順成者祥也大有年上瑞矣何以為記異乎凡災異慶祥皆人為所感而天以其類應之者也人事順於下則天氣和於上宣公弑立逆理亂倫水旱螽蟥饑饉之變相繼而作史不絕書宜也獨於是冬乃大有年所以為異乎夫有年大有年一耳古史書之則為祥仲尼筆之則為異此言外微旨非聖人莫能修之者也

已定王十

十有七年

晉景八齊頃七衛穆八蔡文二十
辛鄭襄十三曹宣三陳成七杞桓

四十五宋文十九秦
桓十三楚莊二十二

春王正月庚子許男錫我卒音註

昭公卒子靈公立

丁未蔡侯申卒音註

文公卒子景侯固立

夏葬許昭公葬蔡文公

日卒書名赴而得禮記之詳也葬而不月其畧在內
宣公為國務華而無忠信誠慤之心計利而不知禮
義邦交之實哀死送終獨厚於齊而利害不切其身
者皆闕如也大則薄其君親次則忽於盟主又其次
若秦若衛若滕雖來告訃怠於禮而不曾也此事以觀義自見矣

六月癸卯日有食之

己未公會晉侯衛侯曹伯邾子同盟于斷道音註

晉地

斷音短同盟至新城而再見
斷道之後不曰同盟者寡矣

書同盟者志同欲也大國率之小國畏威而從命非
同欲也小國訴之大國勉強而應焉非同欲也若斷
道之盟諸侯同心謀欲伐齊釋其忿怒非有不得已
而要之者也或以為會同天子之事集宮為壇設方
明如方獄之盟故書
同疑其說之誤矣

秋公至自會

冬十有一月壬午公弟叔肸卒音註

肸許反

稱弟得弟道也稱字賢也何賢乎叔肸宣弑而非之
也非之則胡為不去也兄弟無絕道故雖非之而不

去也與之財則曰我足矣終身不食宣公之祿君子
以是為通恩也論情可以明親親言義可以厲不軌
所以取貴乎春秋書曰公弟而稱字以表之也公子
為正大夫而書卒貴也不為大夫而特書卒賢也或
以為叔肝寵弟在宣公有私親之愛故生而賜氏俾
世其卿與季友仲遂比則其說誤矣誠使叔肝有寵
生而賜氏則是貴戚用事之卿豈有不見於經者齊
年鄭語在外之見於經者季友仲遂在內之見於經
者勢必與聞政事執國命矣況宣公之時煩於聘問
會朝之禮遂蔑季孫歸父交於鄰國衆矣而獨叔肝
不與焉其非生而賜
氏俾世其卿亦明矣

庚定王十有八年晉景九齊頃八衛穆九蔡景公罔
午六年十有八年元年鄭襄十四曹宣四陳成八杞

桓四十六宋文二十秦
桓十四楚莊二十三卒

春晉侯衛世子臧伐齊

保國以禮為本者也齊頃公不謹於禮自己致寇所謂國必自伐而後人伐之矣諸侯上卿皆執國命取必於其君以行其克伐怨欲之私故盟于斷道師于陽穀大戰于鞏逞其志而後止春秋詳書于策見伐與伐者之罪皆音註安

公伐杞音註

自是不書君將征伐在大夫也宣公而下征伐在大夫是故自伐杞取繹凡取皆

不書其人自伐杞凡伐皆不書公

夏四月

秋七月邾人戕鄆子于鄆音註戕音

我者殘賊而殺之也于鄧者刺臣子不能救君難也夷貉無城郭宮室百官有司單車使者直造其廬帳虜其酋長者則有之矣中國則重門擊柝廩陛等威侍衛守禦之嚴奚至於坐使其君為邦人殘賊殺之而莫禦乎邦人蓋嘗執鄧子用之則不共戴天之世讐也既不能復又使邦人得造其國都而戕殺其君曰于鄧者所以深責音註貉音鄧之臣子至此極也

甲戌楚子旅卒音註

莊王卒子共王立楚始書卒

楚僭稱王降而稱子者是仲尼筆之也其不書葬者恐民之惑而避其號是仲尼削之也若楚若吳若徐皆自王降而稱子若滕自侯降而稱子若杞自伯降而稱子四夷雖大皆曰子其降而稱子者貶之也或謂春秋不擅進退諸侯亂名實則非矣述天理正人倫此名實所由定也奚名為亂哉

公孫歸父如晉

宣公因齊得國故刻意事之雖易世猶未怠也及頃公不能謹禮怒晉魯上卿而卻克當國決策討之晉方强盛齊少懦矣於是背齊而事晉其於邦交以利為向背無忠信誠慤之心者也按左氏歸父欲去三桓以張公室與公謀而聘於晉欲以晉人去之夫輕於背與國易於謀大家而不知其本未有能成而無悔也然則公室不可張乎務引其君當道正心以正朝廷禮樂刑政自已出也其庶幾乎必欲倚外援以去之是去疥瘍而得腹心之疾也庸愈哉

冬十月壬戌公薨于路寢

歸父還自晉至笙遂奔齊音註

笙魯境也

仲尼稱孟莊子之孝其不改父之臣與父之政是難能也又曰三年無改於父之道可謂孝矣夫仁人孝子於其父之臣非有大不可如晉悼公於夷羊五之屬必存始終進退之禮而不遽也歸父以君命出使未返而君薨在聘禮有執圭復命于殯之文升自西階于臣皆哭情亦戚矣今宣公猶未殯而東門氏遂忍乎哉書曰歸父還自晉者已畢事之詞也至笙遂奔齊者罪成公君臣死君而忘父逐之亟也穀梁子曰捐殯而奔其父之使者是亦奔父也得經意矣君薨家遺方寸宜亦亂而造次顛沛不失禮焉非志於仁者弗能也詞繁而不殺歸父之善自著矣比事以觀則見當國者有無君之心此春秋所以作不可不察也

春秋傳卷十八

欽定四庫全書

經部

胡氏春秋傳卷二十九至

詳校官監察御史_臣徐如澍

給事中_臣溫常綬覆勘

覆校官主事_臣李駿

校對官學正_臣常循

謄錄貢生_臣潘河

欽定四庫全書

春秋傳卷十九

宋 胡安國 撰

成公上

公名黑肱宣公十四年
法安民立政曰成

周

定王十七年魯成公五年
年定王崩子簡王立

鄭

襄公十五年魯成公四年襄公卒悼
公費立成公年悼公卒弟成公睞立

齊

頃公九年魯成公九年
頃公卒子靈公環立

宋

文公二十一年魯成公二年文公卒子共
公固立成十五年共公卒子平公成立

晉

景公繼霸十年時卻克為政魯成公四年藥書為政
成十年景公有疾晉人立太子州蒲是為厲公是年

景公卒成十八年厲公

弑悼公周立韓厥為政

衛

穆公十年魯成公二年穆公卒子定公
臧立成十四年定公卒子獻公衍立

蔡

景公
二年

曹

宣公五年魯成公十三年
宣公卒弟成公負芻立

滕

文公十年魯成公十六
年文公卒成公原立

陳

成公
九年

杞

桓公四
十七年

薛

詳見隱
公元年

莒

魯成公十四年莒子朱卒一名渠丘公黎比公密州立又名買朱鉏

邾

定公二十四年魯成公十七年定公卒宣公慳立

許

靈公二年魯成公十五年許遷于葉

小邾

詳見僖公元年

楚

共王元年魯成十六年子及將中軍子重將左戰鄢陵楚敗績晉射共王中目楚殺子反

秦

桓公十五年魯成公十四年桓公卒子景公立

吳

魯成公七年吳伐邾始見經即吳子壽夢也壽夢一名乘

越

詳見隱公元年

辛定王十元年晉景十年齊頃九年衛穆十年蔡景二
未七年年鄭襄十五年曹宣五年陳成九年杞

桓四十七年宋文二十一年
秦桓十五年楚共王審元年

春王正月公即位

二月辛酉葬我君宣公

無冰

寒極而無冰者常煥也按洪範傳曰豫恒煥若此政
事舒緩紀綱縱弛之象成公幼弱政在三家公室不
張其象已見故當涸陰沍寒而常煥應之古者日在
北陸而藏冰獻羔而啓朝之祿位實食喪祭冰皆與
焉此亦變調愆伏之一事也今既寒而煥遂廢凌人
之職然策書所載皆經邦大訓人有微而不登其姓

名事有小而不記其本末雨雹冰雪何以悉書天人
一理也萬物一氣也觀於陰陽寒暑之變以察其消
息盈虛此制治於未亂慎於微之意也每慎於微
意也每慎於微然後王事備矣

三月作丘甲

作丘甲蓋兵也古者九夫為井四井為邑四邑為丘
四丘為甸甸地方八里旁加一里為成所取於民者
出長轂一乘此司馬法一成之賦也為齊難作丘甲
蓋兵備敵重困農民非為國之道其曰作者不宜作
也唐太宗問李靖楚廣與周制如何靖曰周制一乘
步卒七十二人甲士三人以二十五人為一甲凡三
甲共七十五人然則一丘所出十有八人積四丘而
具一乘耳今作丘甲者即丘出一甲是一甸之中共
百人為兵矣則未知其所作者三甸而增一乘乎每
乘而增一甲乎魯至昭公時嘗蒐于紅草車千乘則

計甸而增乘未可知也楚人二廣之法一乘至用百有五十人則魯每乘而增一甲亦未可知也賦雖不同其實皆為益兵其數皆增三之一耳先儒或言甲非人人之所能為又以為丘出甸賦加四倍者謬矣

音註

廣古曠反並同

夏臧孫許及晉侯盟于赤棘

初宣公謀以晉人去三桓歸父為是見逐而奔齊矣今季孫當國恨齊人之立宣公納歸父又懼晉侯之或見討也故往結此盟赤棘晉地也其稱及魯所欲也盟非春秋所貴而惡屢盟者非惟長亂亦國用民力所難給也成公即位之初方經大故未有施舍已責建鰥寡救乏困之事也為齊難既作丘甲矣聞將出楚師又遠與晉尋盟豈固本保邦之道乎書及晉侯盟于赤棘非特備齊懼晉蓋三桓懷忿懟君父之

心將有事于齊而汲
汲欲之者罪可見矣

秋王師敗績于茅戎音註

茅戎別種也

程氏曰王師於諸侯不言敗諸侯不可敵王也於夷狄不言戰夷狄不能抗王也不可敵不能抗者理也其敵其抗王道之失也桓王伐鄭兵敗身傷而經不書敗存君臣之義立天下之防也劉康公邀戎伐之敗績於徐吾氏而經不書戰辨內外之分立中國之防也是皆聖人筆削非魯史之舊文也然筆於經者雖以尊君父辨內外為義而君父所以尊內外所以辨則有道矣桓王不以討賊興師而急於伐鄭康公不以惇信持國而輕於邀戎是失其所以君天下禦四夷之道也書敗績于茅戎者言自敗也其自反亦至矣

冬十月

壬定王十一年 晉景十一齊頃十衛穆十一卒 蔡景三
申八年 二年 鄭襄十六曹宣六陳成十杞桓四十八

宋文二十二卒 秦
桓十六楚共二

春齊侯伐我北鄙

初魯事齊謹甚雖易世而聘會不絕也及與晉侯盟
于斷道而後怨隙成再盟于赤棘而後伐我北鄙齊
侯之興是役非義矣魯人為鞏之戰豈義乎同曰憤
兵務相報復而彼此皆無善者則亦不待貶而罪自
見矣 音註 斷音短

夏四月丙戌衛孫良夫帥師及齊師戰于新築衛師敗

績音註

新築衛地書大夫帥師於是始

齊師侵虐而以衛主此戰何也衛侯初與晉同盟于斷道矣又使世子臧與晉同伐齊矣又使孫良夫石稷將侵齊矣及與齊師遇石稷欲還良夫不可曰以師伐人遇其師而還將謂君何若知不能則如無出今既遇矣不如戰也遂戰于新築故齊師雖侵虐而此戰以衛主之也春秋善解紛貴遠怨而惡以兵刃相接故書法如此

六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞏齊師敗

績音註

鞏齊地去齊五百里音安○書會四卿是各自為帥也自文之季年而無使介至是而無將佐

魯三家之

勢成矣

大國三軍次國二軍魯雖大國而四卿並將是四軍也當此時舊制猶存尺地皆公室之土也一民皆公室之兵也上卿行父與僑如嬰齊各帥一軍會戰而臧孫許如晉乞師又逆晉師為之道本不將兵特往來晉魯兩軍之間預謀議耳成公初立主幼國危為季孫一怒埽境內興師而四卿並出肆其憤欲雖無人乎成公之側有不恤也然後政自季氏出矣將稱元帥畧其副屬詞之體也而四卿皆書者豈特為詳內錄哉堅冰之戒亦明矣經之大例受伐者為主而此以四國及之者以一笑之微殘民毒衆幾獲其君而怒猶未怠焚雍門之茨侵車東至海故以四國主之為憤兵之大戒見諸行事深切著明矣

秋七月齊侯使國佐如師己酉及國佐盟于袤婁音註

袁婁齊地去齊五十里。○楚屈完來盟于師。齊桓公退師而後盟于召陵。修禮於楚也。齊侯使國佐如師。晉郤克進師而後盟于袁婁。不禮於齊也。夫以齊桓公之所不敢而四國之大夫敢為之甚矣。鞏戰之忿也。

齊國佐如師與楚屈完來一也。然陞之役則曰來盟于師。盟于召陵。鞏之戰則曰及國佐盟于袁婁。何也。荆楚暴橫。憑陵諸夏。齊桓公仗義聲罪。致討威行。江漢之上不待加兵而楚人怙服。其書來盟于師者。楚人自服而求盟也。盟于召陵者。桓公退舍禮與之盟也。在春秋時。斯為善矣。若夫袁婁則異於是。齊雖侵虐未若荆楚之暴也。諸國大夫含憤積怒。欲雪一笑之恥。至於殺人盈野。非有擊強扶弱之心。國佐如師將以賂免。非服之也。晉大夫又不以德命使齊人盡東其畝。而以蕭同叔子為質。夫蕭同叔子齊君之母也。則亦悖矣。由是國子不可請合。餘燼背城借一。捐而去之。郤克使魯衛之使以其詞為之。請逮于袁婁。

而與之盟則汲汲欲盟者晉也故反以晉人及之若此類見曲直之繩墨矣是故制敵莫如仗義天下莫大於理而強有力不與焉亦可謂深切著明矣

八月壬午宋公鮑卒音註

文公卒子共公國立

庚寅衛侯速卒音註

穆公卒子定公立

取汶陽田音註

汶陽魯地汶音問

汶陽之田本魯田也取者得非其有之稱不曰復而謂之取何也恃大國兵力一戰勝齊得其故壤而不請於天王以正疆理則取之不以其道與得非其有奚異乎然則宜奈何考於建邦土地之圖若在封域之中則先王所錫先祖所受經界世守不可亂矣不然侵小得之春秋固有興滅國繼絕世之義必有處

也魯在戰國時地方五百里而孟氏語慎子曰如有王者作在所損乎在所益乎經於復其故田而書取所損益亦可知矣

冬楚師鄭師侵衛

十有一月公會楚公子嬰齊于蜀音註

蜀魯地。○自屈完以來楚大夫

皆無氏族而書公子自嬰齊始

按左氏魯衛受盟于晉從於伐齊故楚為陽橋之役令尹子重曰師衆而後可於是王卒盡行二國稱師著其衆也侵衛則書侵我師于蜀致賂納質沒而不書非諱也書其重者則莫重乎其以中國諸侯降班失列下與夷狄之大夫會也季孫行父為國上卿常使其君尊榮其民免於侵陵之患而危辱至此特起

於忿忮肆其禍心而不知制之以禮也書曰必有忍乃其有濟懲忿窒德德之修也不忮不求行之善也躬自厚而薄責於人遠怨之方也季孫忿忮弗能懲也而辱逮君父不亦惜乎故春秋史外傳心之要典也攷其行事深切著明於以反求諸已則亦知戒矣

丙申公及楚人秦人宋人陳人衛人鄭人齊人曹人邾

人薛人鄆人盟于蜀音註

楚於是始與中國準自此以下楚卿不書皆貶也

盟而魯與必先書公尊內也次書主盟者衆所推也此書公及楚人則知主盟者楚也公子嬰齊秦石說宋華元陳公孫寧衛孫良夫鄭去疾皆國卿也何以稱人楚僭稱王春秋黜之以為荆蠻晉雖不競猶主夏盟諸侯苟能任仁賢修政事保固疆圉要結鄰好同心擇義堅事晉室荆楚雖大何畏焉今乃西向服

從而與之盟不亦恥乎閭宮之詩荆舒是懲魯之訓也乃是之從亦為不善擇矣經於魯君盟會不信則諱公而不書不臣則諱公而不書棄中國從夷狄則諱公而不書蜀之盟棄晉從楚書公不諱何也事同而既貶則從同正始之義也從荆楚而與盟既諱公於僖十九年齊之盟矣是以於此不諱而人諸國之大夫以見意也

癸定王十酉九年

三年

晉景十二齊頃十一衛定公臧元年蔡景四鄭襄十七曹宣七陳成十一杞桓

四十九宋共公固元年秦桓十七楚共三

春王正月公會晉侯宋公衛侯曹伯伐鄭

按左氏諸侯伐鄭討鄭之役也遂東侵鄭公子偃帥師禦之覆諸鄆敗諸丘與夫討鄭之役則復怨勦民

非觀釁也遂東侵則潛師掠境非以律也覆而敗諸則專用詐謀非正勝也度彼參此皆無善也畧而不紀勝負微也晉侯稱爵而以代書何也初為是役必以鄭之從楚也附蠻夷擾中國則盟主有詞于代耳宋衛未葬曷為稱爵背殯越

音註

鄆芒袁反

境以吉禮從金革之事也

辛亥葬衛穆公

二月公至自伐鄭

甲子新宮災三日哭

廟災而哭禮也得禮為常事則何以書繼氏劉絢曰新宮者宣宮也不曰宣宮者神主未遷也知然者丹楹刻桷皆稱桓宮此不舉謚故知其未遷也宮成而主未入遇災而哭何禮哉宣公薨至是二十有八月

緩於遷主可知矣言災則不恭之致亦自見矣此說據經為合或曰禮稱有焚其先人之室則三日哭新宮將以安神主也雖未遷而哭不亦可乎曰先人之室蓋嘗寢於斯食於斯會族屬於斯其居處笑語之所在皆可想也事死如事生故有焚其室則哭之禮也神主未遷而哭於人情何居

乙亥葬宋文公

按左氏文公卒始厚葬並車馬重器備君子謂華元樂舉於是乎不臣考於經未有以驗其厚也數其葬之月則信然矣天子七月諸侯五月大夫三月士踰月以降殺遲速為禮之節不可亂也大公之卒國家安靖外無危難曷為越禮踰時逮乎七月而後克襄事哉故知華元樂舉之棄君於惡而益其侈無疑矣夫禮之厚薄稱人情而為之者也宋公在殯而離次出境從金草之事哀戚之情忘矣顧欲厚葬其君親

此非有所不忍於死者特欲誇耀淫侈無知之人耳
世衰道微禮法既壞無以制其侈心至於秦漢之間
窮竭民力以事丘隴其禍有不可勝言者春秋據
事直書而其失自見此類是也豈不為永戒哉

夏公如晉

鄭公子去疾帥師伐許

公至自晉

宣公薨至是三年之喪畢矣宜入朝京師見天子受
王命然後歸而即政可也嗣守社稷之重而不朝于
周以拜汶陽田之故而往朝于晉其行事亦悖矣此
春秋所為作也公行多不致其書公至自晉何其至
也必有以也

秋叔孫僑如帥師圍棘音註

棘汶陽之邑在濟北蛇丘

按左氏取汶陽之田棘不服故圍之復故地而民不聽至於命上將用大帥環其邑而攻之何也魯於是時初稅畝作丘甲稅役日益重矣棘雖復歸故國所以不願為之民也歟成公不知薄稅斂輕力役修德政以來之而肆其兵力雖得之亦必失之

大雩

晉卻克衛孫良夫伐廐咎如音註

廐咎如赤狄別種也廐音祥咎音臯

冬十有一月晉侯使荀庚來聘音註

晉來聘之始

衛侯使孫良夫來聘丙午及荀庚盟丁未及孫良夫盟

音註

聘而遂盟之於是始

劉敞曰諸侯有聘無盟聘禮也盟非禮也庚與良夫不務引其君當道而生事專命為非禮不信以干先王之典故不繫於國以見其遂事之辱非人臣之操此說然也其言及者公與之盟而不言公見二卿之抗也盟者春秋所惡於惡之中又有惡焉者此類是也

鄭伐許音註

狄鄭也楚之伯鄭為之也由齊桓以來爭鄭於楚桓公卒鄭始朝楚諸侯之入于楚

鄭為亂階也至辰陵鄭帥諸夏而事楚矣敗晉于邲盟十四國之君大夫于蜀皆鄭為之是故外秦而後外鄭也

稱國以伐外之也晉楚爭鄭鄭兩事焉及邲之敗於是乎專意事楚不通中華晉雖加兵終莫之聽也至

此一歲而再伐許甚矣夫利在中國則從中國利在
荆蠻則從荆蠻而不擇於義之可否以為去就其於
天理之存者幾希況又馮弱犯寡一歲之中而再動
干戈於鄰國不既甚乎春秋之法不欲少為假借筆
之於書所以懲惡也以為告辭畧而從
告乃實錄耳一字為褒貶義安在也

甲定王二

四年

晉景十三齊頃十二衛定二蔡景五鄭
襄十八卒曹宣八陳成十二杞桓五十

宋共二秦桓
十八楚共四

春宋公使華元來聘音註

宋始聘魯

三月壬申鄭伯堅卒音註

襄公卒悼公費立

杞伯來朝

夏四月甲寅臧孫許卒

公如晉

葬鄭襄公

秋公至自晉

冬城鄆音註

鄆魯西
邑音運

鄭伯伐許

前此鄭襄公伐許既惡之矣今悼公又伐許乃復稱
爵何也喪未踰年以吉禮從金革之事則忘親矣稱
爵非美詞所以著其惡也

乙定王二十五年 晉景十四齊頃十三衛定三蔡景六
亥一年崩 鄭悼公費元年曹宣九陳成十三杞

桓五十一宋共三
秦桓十九楚共五

春王正月杞叔姬來歸音註 叔姬魯僖
公次女

前書杞伯來朝左氏以為歸叔姬也此書杞叔姬來
歸則出也春秋於內女其歸其出錄之詳者男女居
室人之大倫也男子生而願為之有室女子生而願
為之有家父母之心人皆有之而不能為之擇家與
室則夫婦之道苦淫僻之罪多矣王法
所重人倫之本錄之詳也為世戒也

仲孫蔑如宋音註 仲孫蔑孟
獻子也

夏叔孫僑如會晉荀首于穀音註 穀齊
地

梁山崩音註

梁山在馮翊
夏陽縣北

梁山韓國也詩曰奕奕梁山韓侯受命而謂之韓奕者言奕然高大為韓國之鎮也後為晉所滅而大夫韓氏以為邑焉書而不繫國者為天下記異是以不言晉也左氏載絳人之語於禮文備矣而未記其實也夫降服乘縵徹樂出次祝幣史辭六者禮之文也古之遭變異而外為此文者必有恐懼修省之心主於內若成湯以六事撿身高宗克正厥事宣王側身修行欲銷去之是也徒舉其文而無實以先之何足以弭災變乎夫國主山川至於崩竭當時諸侯未聞有戒心而修德也故自是而後六十年間弑君十有四亡國三十二其應亦懔矣春秋不明著其事應而事應具存其可忽諸

秋大水

冬十有一月己酉天王崩音註

定王崩于簡王立

十有二月己丑公會晉侯齊侯宋公衛侯鄭伯曹伯邾

子杞伯同盟于蟲牢音註

蟲牢鄭地在陳留封丘縣北

按左氏許靈公愬鄭伯于楚鄭伯如楚訟不勝歸而請成于晉盟于蟲牢鄭服也鄭服則何以書同盟天王崩赴告已及在諸侯之策矣以所聞先後而奔喪禮也而九國諸侯會盟不廢故特書同盟以見其皆不臣春秋惡盟誓於惡之中又有惡焉者此類是也

丙簡王
子元年

六年

晉景十五齊頃十四衛定四蔡景七鄭悼二卒曹宣十陳成十四杞桓五十二宋共

四秦桓二十楚共六吳子壽夢元年

春王正月公至自會

二月辛巳立武宮

武宮武公之宮立武宮非禮也喪事即遠有進而無退宮廟即遠有毀而無立故二昭二穆與太祖而五者諸侯之廟制也曰考廟曰王考廟曰皇考廟皆有祭焉曰顯考廟曰祖考廟享嘗乃止去祖為壇去壇為墠墠有禱則祭無禱乃止去墠為鬼諸侯之祭法也武公至是歷世十一其毀已久而輒立焉非即遠有終之意故特書音註音善

取鄆音註

鄆附庸國音專

鄆微國也書取者滅之也滅而書取為君隱也項亦國也其書滅者以僖公在會季孫所為故直書其事

而不隱此春秋尊君抑臣以辨上下謹於微之意也
人倫之際差之毫釐繆以千里故仲尼特立此義以
示後世臣子使以道事君而無朋附權臣之惡於傳
有之犯上干主其罪可赦乖忤貴臣禍在不測故臣
子多不憚人主而畏權臣如漢谷永之徒直攻成帝
不以為嫌至於王氏則周旋相比結為死黨而人主
不之覺此世世之公患也歸父家遣緣季氏也朝吳
出奔因無極也王章殺身忤王鳳也鄴侯寄館避元
載也惟殺生在下而人主失其柄也是以黨與衆多
知有權臣而不知有君父矣使春秋之義得行尊君
抑臣以辨上下每謹於微豈有此患乎

衛孫良夫帥師侵宋

夏六月邾子來朝

公孫嬰齊如晉音註

嬰齊叔
肝子

壬申鄭伯費卒音註

費音祕○悼公
卒弟成公踰立

秋仲孫蔑叔孫僑如帥師侵宋

魯遣二卿為主將動大衆焉有事於宋而以侵書者
潛師侵掠無名之意蓋陋之也於衛孫良夫亦然上
三年嘗會宋衛同伐鄭矣次年宋使華元來聘通嗣
君矣又次年魯使仲孫蔑報華元矣是年冬鄭伯背
楚求成于晉而魯衛與宋又同盟于蟲牢矣今而有
事於宋上卿受鉞大衆就行而師出無名可乎故特
書侵以罪之也左氏載此師晉命也後二年宋來納
幣請伯姬焉則此師為晉而舉非魯志明矣兵戎有
國之重事邦交人道之大倫聽命於人
不得已焉將能立乎春秋所以罪之也

楚公子嬰齊帥師伐鄭音註

楚始書大夫將自是必圍滅而後貶人之

冬季孫行父如晉

晉欒書帥師救鄭

荆楚僭號稱王聖人深惡痛絕而不赦者大一統以存周使民著於君臣之義也鄭能去逆効順是改過遷善出幽谷而遷喬木也嬰齊為是帥師又因其喪而伐之不義甚矣經所以深惡之也書卿帥師伐鄭於大無貶辭何以知其深惡楚也下書欒武子帥師救鄭則知之矣凡書救者未有不善之也而伐者之罪著矣按左氏晉楚遇于桑隧軍帥之欲戰者八人武子遂還則無功也亦何善之有曰此春秋之所以善欒書也兩軍相加兵刃既接折馘執俘計功受賞此非仁人之心王者之事故舞干而苗格者舜也因

壘而崇降者丈也次于陘而屈完服者齊桓也會于蕭魚而鄭不叛者晉悼也武子之能不遷戮而知還

也亦庶幾哉

丁簡王七年晉景十六齊頃十五衛定五蔡景八鄭成
丑二年公踰元年曹宣十一陳成十五杞桓五十

三宋共五秦桓二十
一楚共七吳壽夢二

春王正月鼯鼠食郊牛角改卜牛鼯鼠又食其角乃免

牛音註

鼯音分

穀梁子曰郊牛日展斛角而知傷展道盡矣其所以備災之道不盡也改卜牛鼯鼠又食其角則亡乎人矣非人之所能也所以免有司之過也有司免過即變異也其應云何許翰曰小害大下賊上食而又食

三桓子孫相繼之象也宣公有虞三桓之志至成始弗戒矣理或然也

音註

斛音球

吳伐郟音註

郟音談

稱國以伐狄之也吳本太伯之後以族屬言則周之伯父也何以外之為其僭天子之大號也按國語云命圭有命固曰吳伯不曰吳王然則吳本伯爵也後雖益熾浸與中國會盟進而書爵不過曰子亦不以本爵與之故記於禮書曰四夷雖大皆曰子此春秋之法仲尼之制也而以為不敢擅進退諸侯亂名實者誤矣

夏五月曹伯來朝

不郊猶三望

欽定四庫全書

吳郡朱長文曰禮天子有四望諸侯則祭境內山川而已魯當祭泰山泰山魯之境也禮所得祭故不書三望僭天子禮是以書之其說是矣楚子軫言三代命祀祭不越望而曰江漢沮漳楚之望非也楚始受封濱江之國漢水沮漳豈其境內

音註

朱長文按宋鑑紹興間人

著春秋通志二十卷

秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵音註馬陵

地衛

楚人軍旅數起頻年伐鄭以其背已而從諸夏也與莊之欲討微舒而入陳亦異矣書大夫之名氏書帥

師書伐而無貶詞者所謂不待貶絕而罪自見者也
晉合八國之君親往救鄭則攘荆楚安中國之師也
欲著其善故特書救鄭以美之言救則楚罪益明而
鄭能背夷即華善亦著矣前此晉遣上將諸國不與
焉此則其君自行而會合諸國則楚人暴橫憑陵諸
夏之勢益張亦可見矣故盟于馬陵而書同盟者同
病楚也

公至自會

吳入州來音註

州來楚邑○吳楚交兵不書至是始書
之傳曰是以始大通吳於上國晉人為

也

冬大雩

衛孫林父出奔晉

春秋傳卷十九

欽定四庫全書

春秋傳卷二十

宋 胡安國 撰

成公下

戊簡王八年

晉景十七齊頃十六衛定六蔡景九鄭成
宣三年二曹宣十二陳成十六杞桓五十四宋共

六秦桓二十二楚

共八吳壽夢三

春晉侯使韓穿來言汶陽之田歸之于齊

汶陽之田本魯田也魯人恃大國之威以兵力脅齊
得其故地而不正疆理於天王則取之不以其道也
卻克戰勝令於齊曰反魯衛之侵地齊既從之今復
有命伴歸諸齊則歸之不以其道也而齊人貪得晉

有二命穿也列卿無所諫止皆罪也來言者緩詞也
歸之于者易詞也為國以禮者無憚於強而魯侯微
弱遂以歸齊而不能保罪亦見矣

晉欒書帥師侵蔡

公孫嬰齊如莒

宋公使華元來聘

夏宋公使公孫壽來納幣音註

公孫壽蕩意諸之流

納幣不書此何以書公孫壽卿也納幣使卿非禮也
禮不可畧亦不可過惟其稱而已矣畧則輕大倫過
則溺私愛宋公之請伯姬魯侯之嫁其女皆致其厚
者也而不知越禮逾制豈所以重大婚之禮哉經悉

書之為
後法也

晉殺其大夫趙同趙括

按左氏趙莊姬為趙嬰之亡譖于晉侯曰原屏將為亂欒卻為徵晉討趙同趙括以其田與祁奚韓厥言於君曰成季之勲宣孟之忠而無後為善者懼矣乃立武而反其田然則同括無罪為莊姬所譖而欒卻害之也故稱國以殺而不去其官以見晉之失政刑矣

秋七月天子使召伯來賜公命音註

召音邵賜命止此

諸侯嗣立而入見則有賜已修聘禮而來朝則有賜能敵王所愾而獻功則有賜成公即位服喪已畢而不入見既更五服一朝之歲矣而不如京師又未嘗敵王所愾而有功也何為來賜命乎召伯者縣內諸

侯為王卿士者也來賜公命罪邦君之不王譏天子之僭賞也臨諸侯曰天王君天下曰天子蓋一人之稱

冬十月癸卯杞叔姬卒

晉侯使士燮來聘叔孫僑如會晉士燮齊人邾人伐鄭

按左氏士燮來聘言伐鄭也以其事吳故公請緩師不可吳初伐鄭季孫固曰中國不振旅蠻夷入伐而莫之或恤亡無日矣當其時既不能救及其既成豈獲已也而又率諸國伐之何義乎前書來聘下書會伐晉侯之為盟主可見矣魯既知其不可從大國之令而不敢違其不能立亦可知矣

衛人來媵音註

為伯姬歸宋也媵音孕又音佞

媵者何諸侯有三歸嫡夫人行則姪娣從二國來媵亦以姪娣從凡一娶九女所以廣繼嗣三國來媵非禮也夫以禮制欲則治以欲敗禮則亂而諸侯一娶十有二女則是以欲敗禮矣備書三國以明適制為後戒也

已簡王九年晉景十八齊頃十七卒衛定七蔡景十鄭

卯四年成三曹宣十三陳成十七杞桓五十五宋

共七秦桓二十三

楚共九吳壽夢四

春王正月杞伯來逆叔姬之喪以歸

凡筆於經者皆經邦大訓也杞叔姬一女子爾而四書于策何也有男女然後有夫婦有夫婦然後有父子故春秋慎男女之配重大昏之禮以是為人倫之本也事有大於此者乎男而賢也得淑女以為配則

自家刑國可以移風俗女而賢也得君子以為歸則承宗廟奉祭祀能化天下以婦道豈曰小補之哉夷攷杞叔姬之行雖賢不若宋共姬亦不至如鄫季姬之越禮也杞伯初來朝魯然後出之卒而復逆其喪以歸者豈非叔姬本不應出故魯人得以義責之使復歸葬乎魯在春秋時內女之歸不得其所者有矣聖人詳錄其始卒欲為後鑒使得有終而無弊也其經世之慮遠矣

公會晉侯齊侯宋公衛侯鄭伯曹伯莒子杞伯同盟于

蒲音註

蒲衛地

按左氏為歸汶陽之田故諸侯貳於晉晉人懼會于蒲以尋馬陵之盟夫盟非固結之本也衛獻公言於甯喜求復國喜曰必子鮮在不然必敗小邾射以句繹來奔曰使季路要我吾無盟夫信在言前者不言

而自喻誠在令外者不令而自行晉初下令於齊反
魯衛之侵地而齊不敢違者以其順也齊既從之魯
君親往拜其賜矣復有二命俾歸諸齊一與一奪信
不可知無感乎諸侯之解體也晉人不知反求諸已
惇信明義以補前行之愆而又欲刑牲歃血要質鬼
神以御之是從事於末而不知本矣特書同盟以罪
也晉

公至自會

二月伯姬歸于宋

夏季孫行父如宋致女晉人來媵

致女者何女既嫁三月而廟見則成婦矣而後父母
使人安之故謂之致也常事爾何以書致女使卿非

禮也經有因褒以見貶者初獻六羽之類是也亦有因貶以見褒者致女來媵之類是也伯姬賢行著于家故致女使卿特厚其嫁遣之禮賢名聞于遠故諸國爭媵信其無妬忌之行程氏以為一女子之賢尚聞於諸侯況君子哉或曰魯女雖賢豈能聞於遠乎曰古者庶女與非敵者則求為媵固為之擇賢小君則諸侯之賢女自當聞矣

秋七月丙子齊侯無野卒

音註
頃公卒子
靈公環立

晉人執鄭伯晉欒書帥師伐鄭

按左氏楚人以重賂求鄭鄭伯會公子成于鄧秋鄭伯如晉晉人討其貳於楚執諸銅鞮欒書伐鄭鄭使伯黶行成晉人殺之楚子重侵陳以救鄭稱人而執者既不以王命又不歸諸京師則非伯討也殺伯黶

不書者既執其君矣則行人為輕亦不足紀也楚子重侵陳與處父救江何異削而不書者鄭亦有罪焉耳夫鄭之從晉舊矣今以重賂故又與楚會則是惟利之從而不要諸義也故鄭無可救之善楚不得有能救之名

冬十有一月葬齊頃公

楚公子嬰齊帥師伐莒庚申莒潰楚人入鄆音註

鄆莒別邑

也。伐稱名入稱人

書法與會蜀盟蜀同

按左氏楚子重自陳伐莒圍渠丘城惡泉潰楚師圍莒莒城亦惡庚申莒潰楚遂入鄆孟子曰鑿斯池也築斯城也與民守之效死而民不去是則可為也夫鑿池築城者為國之備所謂事也效死而民不去為

國之本所謂政也。昔恃其陋不修城郭決辰之間楚克其三都信無備矣。然兵至而民逃其上不能使民效死而不去則昧於為國之本也。雖隆昌之城何益乎。故經於莒潰特書日以謹之者以明城郭溝池重門擊柝皆守邦之末務必以固本安民為政之急耳。

秦人白狄伐晉

經所謹者內外之辨也。晉嘗與白狄伐秦秦亦與白狄伐晉族類不復分矣。其稱人貶詞也。武王伐商誓師牧野庸蜀羌髳微盧彭濮皆與焉。豈亦不謹乎。除天下之殘賊而出民於水火之中非晉之伐秦秦之伐晉所可藉口也。今晉秦連兵更相邀結夫中國友邦自相侵伐已為不義又與非我族類者共焉不亦甚乎。晉既失信復聽婦人讒說殺其世臣而詢侯皆貳秦狄交伐比事以觀可謂深切著明矣。

鄭人圍許

城中城音註

中城者郭之內而宮之外也

經世安民視道之得失不倚城郭溝池以為固也穀梁子謂凡城之誌皆譏其說是矣莒雖恃陋不設備至使楚人入鄆苟有令政使民效死而不潰寇亦豈能入也城非春秋所貴而書城中城其為儻守益微矣王公設險以守其國非歟曰百雉之城七里之郭設險之大端也謹於禮以為國辨尊卑分貴賤明等威異物采凡所以杜絕陵僭限隔上下者乃體險之大用也獨城郭溝池之足恃乎

庚簡王十年

晉景十九年齊靈公環元年衛定八蔡景辰五年十一鄭成四曹宣十四陳成十八杞桓五

十六宋共八秦桓二十
四楚共十吳壽夢五

春衛侯之弟黑背帥師侵鄭

按左氏衛子叔黑背侵鄭晉命也其曰衛侯之弟者子叔黑背生公孫剽孫林父甯殖出衛侯衍而立剽亦以父有寵愛之私故得立耳此與齊之夷仲年無異其特書弟以為後戒可謂深切著明矣

夏四月五卜郊不從乃不郊

五月公會晉侯

景

齊侯

靈

宋公

共

衛侯

定

曹伯

宣

伐鄭

齊人來媵

音註

伯姬也異姓來媵非禮也

丙午晉侯獮卒

音註

景公卒太子州蒲五月先立以伐鄭獮乃候反

秋七月公如晉

此葬晉侯也而不書諱之也天子之喪動天下屬諸侯諸侯之喪動通國屬大夫公之葬晉侯非禮也唯天子之事焉可也傳以晉人止公送葬諸侯莫在焉魯人辱之故諱而不書非矣假令諸侯皆在魯人不以為辱而可書乎

冬十月

辛簡王已六年

十有一年

晉厲公州蒲元年齊靈二衛定九蔡景十二鄭成五曹宣十五陳成十九

杞桓五十七宋共九秦桓二
十五楚共十一吳壽夢六

春王三月公至自晉

晉侯使卻犇來聘已丑及卻犇盟音註

犇尺牛反

夏季孫行父如晉

秋叔孫僑如如齊

冬十月

壬簡王
午七年

十有二年

晉厲二齊靈三衛定十蔡景十三鄭
成六曹宣十六陳成二十杞桓五十

八宋共十秦桓二十六
楚共十二吳壽夢七

春周公出奔晉音註

周公天子
三公也

按左氏周公楚惡惠襄之偏且與伯與爭政不勝怒
而出王使劉子復之盟于鄆而入三日復出奔晉夫
人主無誠慤之心而下要大臣盟是謂君不君人臣
無忠信之實而上與人主盟是謂臣不臣既已要質

鬼神以入矣又叛盟失信而出奔則是自絕於天也
自周無出而書曰出者見周室衰微刑政號令不行
於天
下爾

夏公會晉侯衛侯于瑣澤音註

○瑣澤地闕公羊作沙澤
此晉楚為成也於是

晉士燮會楚公子罷許偃盟于
宋西門之外不書存中國也

秋晉人敗狄于交剛音註

交剛
狄地

冬十月

癸簡王
未八年

十有三年

晉厲三齊靈四衛定十一蔡景十四
鄭成七曹宣十七卒陳成二十一杞

桓五十九宋共十一秦桓二
十七楚共十三吳壽夢八

春晉侯使卻錡來乞師音註

錡魚綺反

晉主夏盟行使諸侯徵會討貳誰敢不從以霸主之尊而書曰乞師何也列國疏封雖有大小土地甲兵受之天子不相統屬魯兵非晉所得專也今晉不以王命興諸侯之師故特書曰乞以見其卑伏屈損無自反而縮之意矣聖人作春秋無不重內而輕外至於乞師則內外同辭者蓋皆有報怨復讎貪得之心是以如此若夫誅亂臣討賊子請於天王以大義驅之誰不拱手以聽命何至於乞哉噫此聖人所以垂戒後世見諸行事之深切著明者也

三月公如京師

夏五月公自京師遂會晉侯齊侯宋公衛侯鄭伯曹伯

邾人滕人伐秦

諸侯每歲侵伐四出未有能修朝覲之禮者今公欲會伐秦道自王都不可越天子而往也故皆朝王而不能成朝禮書曰如京師見諸侯之慢也因會伐而行矣又書公自京師以伐秦為遂事者此仲尼親筆明朝王為重存人臣之禮也古者諸侯即位喪服畢則朝小聘大聘終則朝巡狩于方嶽則朝觀春秋所載天王遣使者屢矣十二公之迷職蓋闕如也獨此年書公如京師又不能成朝禮不敬莫大焉君臣人道之大倫也而竟至於此故仲尼嘗有言曰如有用我者吾其為東周乎為此懼作春秋其或抑或揚或予或奪所以明君臣之義者至矣其義得行則臣必敬於君子必敬於父天理必存人欲必消大倫必正豈曰小補之哉此以伐秦為遂事之意也

曹伯廬卒于師音註

宣公卒成
公負芻立

秋七月公至自伐秦

冬葬曹宣公

甲簡王

十有四年

晉厲四齊靈五衛定十二年蔡景十
五鄭成八曹成公負芻元年陳成二

申九年

十二杞桓六十宋共十二秦桓

二十八卒楚共十四吳壽夢九

春王正月莒子朱卒音註

渠丘公卒犂
比公密州立

夏衛孫林父自晉歸于衛

秋叔孫僑如如齊逆女

鄭公子喜帥師伐許

九月僑如以夫人婦姜氏至自齊音註

婦姜氏有姑之常稱也若妾姑

則不書氏是故有成風則出姜不氏有敬嬴則穆姜不氏所以別嫡姑也

穀梁曰大夫不以夫人以夫人非正也刺不親迎也僑如之不氏一事而再見者卒名耳然則娶于他邦而道里或遠必親迎乎以封壤則有小有遠邇或迎之於其國或迎之於境上或迎之於所館中禮之節可也

冬十月庚寅衛侯臧卒音註

定公卒子獻公衍立

秦伯卒音註

桓公卒子景公立

乙簡王
西十年

十有五年

晉厲五齊靈六衛獻公衍元年蔡景
十六鄭成九曹成二陳成二十三杞

桓六十一宋共十三卒秦景
公元年楚共十五吳壽夢十

春王二月葬衛定公

三月乙巳仲嬰齊卒

嬰齊者公子遂之子公孫歸父之弟也歸父出奔齊
魯人徐傷其無後也於是使嬰齊後之故書曰仲嬰
齊此可謂亂昭穆之序失父子之親者以後歸父則
弟不可為兄嗣以後襄仲則以父字為氏亦非矣

癸丑公會晉侯

厲

衛侯

獻

鄭伯

成

曹伯

成

宋世子

成

齊

國佐邾人

定

同盟于戚音註

國佐齊大夫
國武子也

晉侯執曹伯歸于京師音註

特書晉侯討有罪也

稱侯以執伯討也何以為伯討晉合諸侯伐秦曹宣公卒于師曹人使公子負芻守使公子欣時逆曹伯之喪負芻殺其大子而自立至是晉侯執之又不敢自治而歸于京師使即天刑夫是之謂伯討春秋執諸侯者衆矣未有執得其罪如此者故獨書其爵

公至自會

夏六月宋公固卒音註

共公卒子平公成立

楚子伐鄭

秋八月庚辰葬宋共公

宋華元出奔晉宋華元自晉歸于宋宋殺其大夫山宋

魚石出奔楚音註

宋殺其大夫山此蕩澤稱國以殺而山不書氏有司法守之辭也魚石公

子目夷

曾孫

宋六卿魚氏蕩氏向氏鱗氏皆桓族也華氏戴族也華元為右師魚石為左師蕩氏汰而驕共公卒已葬蕩澤弱公室殺公子肥華元曰我司君臣之訓而不能正罪大矣不能治官敢賴寵乎乃出奔晉魚石將止之魚府曰元反必討是無桓氏也石曰彼多大勲國人所與不反懼桓氏之無祀於宋也遂自止元於河上元歸使國人攻桓氏殺蕩山出魚石國然後定元之出奔晉與歸于宋皆不省文者著其正也書之重詞之複必有美惡焉詞繁而不殺所以與之也可以不賴寵而出奔以國人與晉皆許之討而後入正可

知矣蘇轍謂使元懷祿顧寵重於出奔則不能討此說是也山不書氏背其族也背其族者伐其本也人而無本人道絕矣葛藟猶能庇其本根況於人而忍伐其本乎

冬十有一月叔孫僑如會晉士燮齊高無咎宋華元衛

孫林父鄭公子鮑邾人會吳于鍾離音註

鮑音秋鍾離楚邑淮南縣

此會吳之始亦晉以諸侯之大夫會吳之始○自是大夫自為會矣

吳以號舉外之也會而殊會外之也殊會有二義會王世子于首止意在尊王室不敢與世子抗也會吳于鍾離于粗于向意在賤吳子而罪諸侯不敢與之敵也夫以太伯至德是始有吳以族言之則周之伯父也至其後世遂以號舉者以其僭竊稱王不能居中國之爵號耳成襄之間中國無霸齊晉大國亦皆

俛首東向而親吳聖人蓋傷之
故特殊會可謂深切著明矣

許遷于葉音註

葉近楚之邑音攝
今南陽葉縣是也

丙簡王十
成一年

十有六年

晉厲六齊靈七衛獻二蔡景十七
鄭成十曹成三陳成二十四杞桓

六十二宋平公成元年秦景
二楚共十六吳壽夢十一

春王正月雨木冰

雨水冰者雨而木冰也何休曰木者少陽幼君大臣
之象冰者凝陰兵之類也冰脅木者君臣將執於兵
之微未幾而有沙隨若丘之事天人之際休
咎之應焉可誣也而欲盡廢五行傳亦過矣

夏四月辛未滕子卒音註

文公卒成
公原立

鄭公子喜帥師侵宋音註

喜即子罕

六月丙寅朔日有食之

晉侯使欒黶來乞師音註

黶音黶

甲午晦晉侯及楚子鄭伯戰于鄢陵楚子鄭師敗績音

註

鄢陵鄭地

不書師敗績以其君親集矢於目而身傷為重也當是時兩軍相抗未有勝負之形晉之捷也亦幸焉爾幸非持勝之道范文子所以立於軍門有聖人能內外無患盍釋楚以為外懼之戒乎楚師雖敗其勢益張晉遂怠矣卒有欒氏之譖而誅三郤國內大亂聖人備書以見行事之深切著明也

楚殺其大夫公子側

秋公會晉侯齊侯衛侯宋華元邾人于沙隨不見公音

註

沙隨
宋地

臣子之於君父揚其美不揚其惡為尊者諱為親者諱禮也聖人假魯史以示王法其於魯事有君臣之義故君弑則書薨易地則書假滅國則書取出奔則書孫屈已而與強國之大夫盟則書及叛盟失信而莫適守則沒公而書會凡此類雖不沒其實示天下之公必隱避其辭以存臣子之禮然則沙隨之會晉不見公是魯侯之大辱深可恥焉者矣曷為直書其事而不諱乎曰春秋伸道不伸邪榮義不榮勢正已而無恤乎人以仁禮存心而不憂橫逆之至者也沙隨之會魯有內難師出後期所當恤者晉人聽叔孫

僑如之譖怒公而不見曲在晉矣魯侯自反非有背
仁棄禮不忠之咎也昔曾子嘗聞大勇於夫子曰自
反而縮雖千萬人吾往矣孟子言浩然之氣至大至
剛以直養而無害則塞乎天地之間沙隨之不見於
公何歎乎直書而不諱者示天下後世使知大勇
浩然之氣所以守身應物如此其垂訓之義大矣

註

橫去聲難萬旦反
背音佩應於證反

公至自會

公會尹子晉侯齊國佐邾人伐鄭音註

尹子周卿士子
爵也於是始以

王臣
與伐

曹伯歸自京師

曹伯不名其位未嘗絕也不絕其位所以累乎天王也其言自京師王命也言天王之釋有罪也善不蒙賞惡不即刑以堯為居舜為臣雖得天下不能一朝居也負芻殺世子而自立不能因晉之執真諸刑典而使復國則無以為天下之共主矣

九月晉人執季孫行父舍之于荅丘音註

荅丘晉地
荅音條

冬十月乙亥叔孫僑如出奔齊

十有二月乙丑季孫行父及晉卻曄盟于扈音註

晉許
魯平

盟故

公至自會

乙酉刺公子偃

按左氏宣伯通於穆姜欲去季孟而取其室戰于鄢陵之日公將行穆姜送公而使逐二子公以晉難告曰請反而聽命姜怒公子偃公子鉏趨過指之曰女不可是皆君也公待于壞墮申宮敝備設守而後行是以後使孟獻子守於公宮宣伯使告卻攄曰魯侯待于壞墮以待勝者卻攄取貨於宣伯而訴公於晉侯晉侯不見公公會諸侯伐鄭將行姜又命公如初公又申守而行宣伯使告卻攄曰魯之有季孟猶晉之有欒范也政令於是乎成今其謀曰晉政多門不可從也寧事齊楚有亡而已蔑從晉矣若欲得志於魯請止行父而殺之我斃蔑也不然歸必叛晉人執季父于于莒丘公還待于鄆使子叔聲伯請季孫于晉卻攄曰苟去仲孫蔑而止季孫行父吾與子國親於公室對曰僞如之情子必聞之矣若去蔑與行父

是大棄魯國而罪寡君也若猶不棄使寡君得事晉君則夫二人者魯國社稷之臣也若朝亡之魯必夕亡范文子謂欒武子曰季孫於魯相二君矣妾不衣帛馬不食粟可不謂忠乎信讒慝而棄忠良若諸侯何乃許魯平叔季孫出叔孫僑如而盟

音註

還音旋

丁簡王十

十有七年

晉厲七齊靈八衛獻三蔡景十八

亥二年

鄭成十一曹成四陳成二十五杞

桓六十三宋平二秦景三

楚共十七吳壽夢十二

春衛北宮括帥師侵鄭音註

北宮括衛成公曾孫

夏公會尹子單子晉侯齊侯宋公衛侯曹伯邾人伐鄭

六月乙酉同盟于柯陵音註

柯陵鄭西地此言同盟尹單與盟之辭也

秋公至自會

齊高無咎出奔莒音註

高無咎齊大夫也

九月辛丑用郊

郊之不時未有甚於此者也故特曰用郊用者不宜用也或曰蓋以人饗叩其鼻血以薦也古者六畜不相為用況敢用人乎

晉侯使荀瑩來乞師音註

瑩乙耕反

冬公會單子晉侯宋公衛侯曹伯齊人邾人伐鄭

十有一月公至自伐鄭

壬申公孫嬰齊卒于貍脰音註

貍脰地關貍力之反脰市軫反

十有二月丁巳朔日有食之

邾子貍且卒音註

貍音躍且音狙○定公卒宣公慙立

晉殺其大夫卻錡卻犢卻至

楚人滅舒庸音註

舒庸東夷偃姓之國

戊簡王十子三年

十有八年

晉厲八弑齊靈九衛獻四蔡景十九鄭成十二曹成五陳成二十六

杞桓六十四宋平三秦景十四楚共十八吳壽夢十三

春王正月晉殺其大夫胥童

庚申晉弑其君州蒲音註

厲公弑悼
公周立

弑君天下之大罪討賊天下之大刑春秋合於人心而定罪聖人順於天理而用刑固不以大需釋當誅之賊亦不以大刑加不弑之人然趙盾以不越境而書弑許世子止以不嘗藥而書弑鄭歸生以憚老懼讒而書弑楚公子比以不能效死而立而書弑齊陳乞以廢長立幼而書弑晉欒書身為元帥親執厲公於匠麗氏使程滑弑公而以車一乘葬之於翼東門之外而春秋稱國以弑其君而不著欒書之名氏何哉仲尼無私與天為一奚獨於趙盾許止歸生楚比陳乞則責之甚備討之甚嚴而於欒武子閻畧如此乎學者深求其旨知聖人誅亂臣討賊子之大要也而後可與言春秋矣

齊殺其大夫國佐

公如晉

夏楚子鄭伯伐宋魚石復入于彭城

音註彭城宋邑

此伐宋以納魚石其不曰納宋魚石于彭城何也劉敞曰不與納也諸侯失國諸侯納之正也諸侯世也大夫失位諸侯納之非正也大夫不世也諸侯託於諸侯禮也大夫託於諸侯非禮也其言復入者已絕而復入惡之甚者宋魚石晉樂盈是矣

公至自晉

晉侯使士匄來聘

秋杞伯來朝

八月邾子來朝

築鹿圃音註

築牆為鹿苑

己丑公薨于路寢

冬楚人鄭人侵宋

晉侯使士魴來乞師音註

魴音房

十有二月仲孫蔑會晉侯宋公衛侯邾子齊崔杼同盟

于虛打音註

虛打宋地打他丁反

丁未葬我君成公

春秋傳卷二十

欽定四庫全書

春秋傳卷二十一

宋 胡安國 撰

襄公上

公名午成公子母定如謚法因事有功曰襄辟土有德曰襄

周

簡王十四年魯襄公元年簡王崩子靈王立襄二十八年靈王崩子景王立

鄭

成公十三年魯襄公二年成公卒子僖公髡頑立襄七年僖公卒簡公嘉立

齊

靈公十年魯襄公十九年靈公卒子莊公光立襄二十五年莊公弑弟景公杵臼立

宋

平公四年

晉

悼公復霸元年韓厥為政襄七年知罃為政襄十一年會于蕭魚服鄭襄十三年荀偃為政襄十五年悼

衛

公卒子平公彪立襄十九年士句為政襄二十五年趙武為政襄二十七年晉楚盟于宋南北分霸始此獻公五年魯襄公十四年獻公奔齊衛立公孫剽是為瑒公襄二十六年瑒公弒獻復歸于衛襄二十九

年獻公卒
子襄公立

蔡

景公二十年魯襄公三十年景公弒子靈公般立

曹

成公六年魯襄公十八年成公卒子武公滕立

滕

詳見成
公元年

陳

成公二十七年魯襄公四年成公卒子哀公溺立

杞

桓公六十五年魯襄公六年桓公卒子孝公句立襄二十三年孝公卒弟文公益姑立

薛

詳見僖公元年

莒

比公五年魯襄公十六年晉執比公襄三十一年比公弑于展與立

邾

宣公三年魯襄公十六年晉執宣公襄十七年宣公卒悼公華立襄十九年晉執悼公

許

靈公十八年魯襄公二十六年靈公卒于楚悼公買立

小邾

魯襄公七年小邾穆公來朝

楚

共王十九年子重為令尹魯襄公三年子重伐吳卒子辛為令尹襄五年楚殺子辛子震為令尹襄十三

年共王卒子康王昭立襄十五年子庚為令尹襄二十一年子南為令尹二十二年遂子馮為令尹襄二

十五年子木為令尹襄二十八年康王卒邾教麋立

秦

景公五年

吳

壽夢十四年魯襄公十二年壽夢卒諸樊立一名遏襄二十五年遏門子巢卒餘祭立一名載襄二十九

年餘祭卒夷末立一名餘昧

越

詳見隱公元年及昭公元年

已簡王十

元年

晉悼公周元年齊靈十年衛獻五年蔡景二十年鄭成十三年曹成六年陳成

二十七年杞桓六十五年宋平四年秦景五年楚共十九年吳壽夢十四年

春王正月公即位

仲孫蔑會晉欒黶宋華元衛甯殖曹人莒人邾人滕人

薛人圍宋彭城

按左氏曰非宋地追書也然則書圍彭城者魯史舊文也曰圍宋彭城者仲尼親筆也楚已取彭城封魚石成之三百乘矣則曷為繫之宋楚不得取之宋魚石不得受之楚雖專其地君子不登叛人所以正疆域固封守謹王度也

夏晉韓厥帥師伐鄭仲孫蔑會齊崔杼曹人邾人杞人

次于鄆音註

鄆鄭地。書次從晉而宋決也亦以見復伯之難

楚人釋君而臣是助事已悖矣晉於是乎降彭城以魚石等歸遂伐鄭而諸侯次于鄆此皆放於義而行者也傳書楚子辛救鄭而經不書者鄭本為楚以其君之故親集矢於目是以與楚而不貳也棄中國從

蠻判不能以大義裁之惟私欲之從則鄭無可救
之善楚不得有能救之名經所以削之不言救也

音

註

降平聲
為去聲

秋楚公子壬夫帥師侵宋

九月辛酉天王崩音註

簡王崩子
靈王立

邾子來朝

冬衛侯使公孫剽來聘晉侯使荀瑩來聘音註

剽匹
妙反

簡王崩赴告已及藏在諸侯之策矣則宜以所聞先
後而奔喪今邾子方來修朝禮衛侯晉侯方來修聘
事於王喪若越人視秦人之肥瘠曹不與焉而左氏
以為禮此何禮乎滕定公薨世子定為三年喪父兄

百官皆不欲曰吾宗國魯先君莫之行也喪紀益廢
民習於耳目而不察故後世以日易月人子安而行
之不知春秋之義無
君臣之禮豈不惜哉

庚靈王

二年

晉悼二齊靈十一衛獻六蔡景二十一鄭
成十四卒曹成七陳成二十八杞桓六十

六宋平五秦景六楚
共二十吳壽夢十五

春王正月葬簡王

鄭師伐宋

夏五月庚寅夫人姜氏薨

音註姜氏襄公
嫡母也

六月庚辰鄭伯踰卒

音註踰古困反。成公
卒子僖公髡頑立

晉師宋師衛甯殖侵鄭

秋七月仲孫蔑會晉荀罃宋華元衛孫林父曹人邾人

于戚

己丑葬我小君齊姜

叔孫豹如宋

冬仲孫蔑會晉荀罃齊崔杼宋華元衛孫林父曹人邾人滕人薛人小邾人于戚遂城虎牢

虎牢鄭地故稱制邑至漢為成臯今為汜水縣巖險聞於天下猶虞之下陽趙之上黨魏之安邑燕之榆

闕吳之西陵蜀之漢樂地有所必據城有所必守而不可以棄焉者也有是險而不能守故不繫於鄭然則據地設險亦所貴乎天險不可升也地險山川丘陵也王公設險以守其國大易之訓也城郭溝池以為固亦君子之所謹也鑿斯池築斯城與民同守孟子之所以語滕君也夫狡焉思啓封疆而爭地以戰殺人盈野爭城以戰殺人盈城者固非春秋之所貴守天子之土繼先君之世不能設險守國將至於遷潰滅亡亦非聖人之所與故城虎牢而不繫於鄭程氏以為責鄭之不能有也其聖人以待衰世之意小康之事邪

楚殺其大夫公子申

辛靈王三年

晉悼三齊靈十二衛獻七蔡景二十二鄭僖公髡頑元年曹成八陳成二十九杞桓

六十七宋平六秦景七楚

共二十一吳壽夢十六

春楚公子嬰齊帥師伐吳音註

楚始伐吳

公如晉

夏四月壬戌公及晉侯盟于長檣音註

長檣音地檣救居反

公至自晉

六月公會單子晉侯

悼

宋公平

衛侯獻

鄭伯僖

莒子

比

邾子宣齊世子光已未同盟于雞澤音註

雞澤衛地

同盟或以為有三例一則王臣預盟而書同二則諸侯同欲而書同三則惡其反覆而書同夫惡其反覆

與諸侯同欲而書同信矣王臣預盟而書同義則未
安盟于女栗及蘇子也而不書同盟于洮于翟泉會
王人也而不書同然則此三盟者正所謂諸侯同欲
而書同盟也其同欲奈何同病楚也會于柯陵之歲
夏伐鄭楚人師于首止而諸侯還冬伐鄭楚人師于
汝上而諸侯還難澤之盟陳袁僑如會楚師在繁陽
而韓獻子懼平丘之行楚棄疾立復封陳蔡而中國
恐是知此三盟者諸侯皆有戒心而修盟故稱同不
以尹子單子劉子亦預此盟而譏之也夫王臣將命
必惇信明義而後可以表正乎天下諸侯守邦必尊
主奉法而後可以保其社稷今王臣下與諸侯約誓
諸侯亦敢上與王臣要言斯大亂之道也則亦不待
書同盟而
罪自見矣

音註

惡去聲下同要
平聲見去聲

陳侯使袁僑如會

戊寅叔孫豹及諸侯之大夫及陳袁僑盟音註

諸侯在大夫

自為盟始於此

秋公至自會

冬晉荀罃帥師伐許

壬靈王四年晉悼四齊靈十三衛獻八蔡景二十三鄭僖二曹成九陳成三十卒杞桓六十八宋

平七秦景八楚共二
十二吳壽夢十七

春王三月己酉陳侯午卒音註

成公卒子哀公溺立

午者襄公名也孔子作春秋在哀公之世襄公哀公之皇考也曷不諱乎古者死而無諡不以名為諱周

人以謚易名於是乎有諱禮故孟子曰諱名不諱姓
姓所同也名所獨也然禮律所載則有不諱者夫子
兼帝王之道參文質之中而作春秋以法萬世如公
薨不地滅國書取出奔稱孫之類所以放其文也註
公名同而書同盟僖公名申而書戊申定公名宋而
書宋人之類所以從其質也後世不明此義則有以
諱易人之名者又有以諱易人之姓者詩書則諱臨
丈則諱嫌名則諱二名則偏諱愚者違禮以為孝諂
者獻佞以為忠忌諱繁名
實亂而春秋之法不行矣

夏叔孫豹如晉

秋七月戊子夫人如氏薨音註

如氏成公妾襄
公母如杞姓

葬陳成公

八月辛亥葬我小君定姒音註

定姒也

冬公如晉

陳人圍頓

癸靈王

五年

晉悼五齊靈十四衛獻九蔡景二十四鄭

巳四年

僖三曹成十陳哀公弱元年杞桓六十九

宋平八秦景九楚共

二十三吳壽夢十八

春公至自晉

夏鄭伯使公子發來聘

叔孫豹鄆世子巫如晉音註

以鄆世子比魯大夫故書叔孫豹鄆世子巫如晉

仲孫蔑衛孫林父會吳于善道音註

善道吳地魯衛俱受命於晉故不言

及吳

秋大雩

楚殺其大夫公子壬夫

公會晉侯宋公陳侯衛侯鄭伯曹伯莒子

比

邾子宣滕

子成薛伯齊世子光吳人鄆人于戚音註

戚衛地。於是盟于戚吳

初與諸侯盟也不書盟為晉諱也吳晉之盟春秋終諱之見哀十三年

吳何以稱人按左氏吳子使壽越如晉請聽諸侯之好晉人將為之合諸侯使魯衛大夫會吳于善道且

告會期然則戚之事乃吳人來會不為主也來會諸
侯而不為主則進而稱人諸侯往與之會而主吳則
貶而稱國聖人之情
音註 好去聲為去
見矣春秋之義明矣
聲見音現

公至自會

冬戍陳**音註**

戍不書惟悼公之
戍陳鄭也持書之

楚公子貞帥師伐陳

公會晉侯宋公衛侯鄭伯曹伯齊世子光救陳

十有二月公至自救陳

辛未季孫行父卒

甲靈王六年晉悼六齊靈十五衛獻十蔡景二十五鄭
午五年僖四曹成十一陳哀二杞桓七十卒宋平

九秦景十楚共二
十四吳壽夢十九

春王三月壬午杞伯姑容卒音註
桓公卒子
孝公句立

夏宋華弱來奔

秋葬杞桓公

滕子來朝

莒人滅鄆

穀梁子曰莒人滅鄆非滅也立異姓以蒞祭祀滅亡
之道也公羊亦云莒女有為鄆夫人者蓋欲立其出

也或曰鄆取莒公子為後罪在鄆子不在莒人春秋
應以梁亡之例而書鄆亡不當但責莒人也今直罪
莒舍鄆何哉曰莒人之以其子為鄆後與黃歇進李
園之妹於楚王呂不韋獻邯鄲之姬與秦公子其事
雖殊其欲滅人之祀而有其國則一也春秋所以釋
鄆而罪莒歟以此防民猶有以韓謠為世嗣昏亂紀
度如郭氏者

冬叔孫豹如邾

季孫宿如晉音註

宿行父
之子

十有二月齊侯滅萊音註

萊姜姓子爵
國於東夷

乙靈王七年

晉悼七齊靈十六衛獻十一蔡景二十六
鄭僖五辛曹成十二陳哀三杞孝公勾元

年宋平十秦景十一楚
共二十五吳壽夢二十

春郊子來朝音註

郊國名少皞氏之後音談

夏四月三卜郊不從乃免牲

小邾子來朝

城費音註

費魯邑音秘。自城費而季氏始強

費季氏邑也按左氏南遺為費宰叔仲昭伯為隧正欲善季氏而求媚於南遺謂遺請城費吾多與而役故季氏城費夫文子相三君無衣帛之妾無食粟之馬無藏金玉無重器備則固忠於公室而不顧其所食之私邑也及行父卒宿之不忠遂專魯國之政羣小媚之無故勞民妄興是役季氏益張其後孔子行

乎季孫三月不違至於帥師墮費其越禮不度可知矣然則書城費乃履霜堅冰之戒強私家弱公室之萌據事直書而義自見矣用人不惟其賢惟其世豈不殆哉

秋季孫宿如衛

八月蝨

冬十月衛侯

獻

使孫林父來聘壬戌及孫林父盟

楚公子貞帥師圍陳

十有二月公會晉侯宋公陳侯衛侯曹伯莒子邾子于

鄒音註

鄒鄭地音委又音為

鄭伯駘頑如會未見諸侯丙戌卒于郕音註

駘苦門反
郕鄭地七

報反又采南反卒于郕為子
駘所弑也僖公弑簡公嘉立

按鄭僖公三傳皆以為弑而春秋書卒者左氏則曰
以瘞疾赴也公羊則主為中國諱之說穀梁則主不
使得加之說若左氏所言是君弑而可以偽赴又順
其欲而不彰則亂臣賊子免於見討而春秋非傳信
之書矣然則弑而書卒二傳之說蓋所以立萬世臣
道之防禰逆賊之魄疑得聖人之意顧習其說者未
之察爾夫弑君之賊其惡不待貶絕而自見矣見弑
者豈無不善之積以及其身者乎衛桓則以嫡母無
寵宋瑒則以亟戰疲民齊襄則以行同鳥獸鄭夷則
以侮慢大臣蔡固則以淫而不父陳平國則以殺諫
臣而通于夏氏楚虔則以多行無禮奚齊則以嬖孽
而國人不之君吳餘祭則以輕近刑人而晉州蒲欲

盡去羣大夫而立其左右也若天鄭僖公則異於是矣會盟者禮義之所出也禮義者治平之與鄰也僖公欲從諸侯會于鄆則是貴盟誓為守禮之君也諸大夫欲背諸夏與荆楚則是背盟誓為棄禮之民也以守禮之君而見弑於棄禮之民豈有不善之積以及其身者乎聖人至是傷之甚懼之甚故變文而書曰鄭伯髡頑如會未見諸侯丙戌卒于鄆未見諸侯其曰如會何致其志也諸侯卒于境內不地鄆鄭邑也其曰卒于鄆見其弑而隱之也卒鄭伯逃歸陳侯聖人之旨微而公穀之義精矣存天理抑人欲之意遠矣

音註

瘡魚畧反為于偽反夫音扶下同

陳侯逃歸音註

自是凡會同無陳

穀梁子曰逃義曰逃逃者匹夫之事上二年諸侯成陳今楚令尹來伐諸侯又救之亦既勤矣為陳侯計

者下令國中大夫申儆備立太子以固守親聽命於諸
侯謀禦敵之策當是時晉君方明八卿和睦諸侯聽
命必能致力於陳矣不此之顧棄儀衛而逃歸此匹
夫之事耳夫義路也禮門也輕棄中國惟蠻夷之懼
是不能由是路出入是門故書
逃歸以罪之可謂深切著明矣

丙靈王八年

晉悼八齊靈十七衛獻十二蔡景二十七
鄭簡公嘉元年曹成十三陳哀四杞孝二

宋平十一秦景十二楚共
二十六吳壽夢二十一

春王正月公如晉

夏葬鄭僖公

鄭人侵蔡獲蔡公子燮

李孫宿會晉侯鄭伯齊人宋人衛人邾人于邢丘音註

邢丘故邢國今

河內平臯縣

蘇轍曰晉悼公修文襄之業改命朝聘之數使諸侯之大夫聽命於會大夫稱人衆辭也朝聘之節儉而有禮衆之所安也臣則以為大夫稱人貶之也昔周公戒成王以繼自今我其立政立事夫不自為政而委於臣下是以國之利器示人而不知寶也朝聘事之大者重煩諸侯而使大夫聽命無乃以姑息愛人而不由德乎使政在大夫而諸侯失國又豈所以愛之也後此八年湟梁之會悼公初沒諸侯皆在而大夫獨盟君若贅旒夫豈一朝一夕之故哉故邢丘之事魯公在晉而李孫宿會見魯之失政也諸侯之大夫貶而稱人謹其始也

公至自晉

莒人伐我東鄙

秋九月大雩

冬楚公子貞帥師伐鄭

齊宣王問於孟子交鄰國有通乎孟子曰有惟智者為能以小事大故大王事獯鬻句踐事吳以小事大畏天者也畏天者保其國鄭介大國之間因強楚之令而欲息肩於晉若能信任仁賢明其刑政經畫財賦以禮法自守而親比四鄰必能保其封境荆楚雖大何畏焉而子耳子國加兵於蔡獲公子變無故怒楚所謂不修文德而有武功者也楚人來討不從則力不能敵從之則晉師必至故國人皆喜而子產獨

不順焉以晉楚之爭鄭自茲弗得寧矣是以獲公子
變特書侵蔡以罪之而公子貞來伐鄭及楚平不復
書矣平而不書以見鄭之屈服於楚而不信也據
牲玉帛待於境上以待強者而請盟其能國乎

晉侯使士匄來聘

丁靈王九年

晉悼九齊靈十八衛獻十三蔡景二十八
鄭簡二曹成十四陳哀五杞孝三宋平十

二秦景十三楚共二
十七吳壽夢二十二

春宋災

夏季孫宿如晉

五月辛酉夫人姜氏薨

音註
姜氏成
公母

秋八月癸未葬我小君穆姜

冬公會晉侯宋公衛侯曹伯莒子邾子滕子薛伯杞伯

小邾子齊世子光伐鄭十有二月己亥同盟于戲音註

戲鄭地
音義

鄭之見伐於楚子駟欲從楚子展曰小國無信兵亂
日至亡無日矣請完守以老楚仗信以待晉其策未
為失也而子駟遂及楚盟於是晉師至矣諸侯伐鄭
晉人令於列國修器械盛饌糧歸老幼居疾于虎牢
肆膏園鄭鄭人恐乃行成荀偃曰逐圍之以待楚人
之救而與之戰不然無成知罃曰許之盟而還師以
敵楚吾三分四軍與諸侯之銳以逆來者於我未病
楚不能矣猶愈於戰暴骨以逞不可以爭大勞未艾

君子勞心小人勞力先王之制也乃許鄭成同盟于戲夫善為國者不師善師者不陣善陣者不戰知武子明於善陣之法以佐晉悼公屢與諸侯伐鄭楚輒救之而不與之戰楚師遂屈得善勝之道矣故下書蕭魚之會以美之音註艾魚廢反

楚子伐鄭

戊靈王十年晉悼十齊靈十九衛獻十四蔡景二十九鄭簡三曹成十五陳哀六杞孝四宋平十

三泰景十四楚共二
十八吳壽夢二十三

春公會晉侯宋公衛侯曹伯莒子邾子滕子薛伯杞伯

小邾子齊世子光會吳于相音註
祖音查

楚地

夏五月甲午遂滅偃陽音註

偃陽姁姓國今彭城傳陽縣偃音福又音逼○此通

吳晉往來之道也

公至自會

楚公子貞鄭公孫輒帥師伐宋

晉師伐秦

秋莒人伐我東鄙

公會晉侯宋公

平

衛侯

獻

曹伯

成

莒子

比

邾子

宣

齊世

子光滕子

成

薛伯

杞伯

小邾子

伐鄭音註

此悼公三

駕之一

冬盜殺鄭公子駢公子發公孫輒音註

盜賊者也以賊者而曰殺三卿

鄭之失政甚矣是故書盜自此始

按左氏鄭公子駢當國發為司馬輒為司空駢與尉止有爭及為田洹司氏堵氏侯氏子師氏皆喪田故五族聚羣不逞之徒以作亂入西宮殺三卿于朝不稱大夫程氏以為失卿職也卿大夫者國君之陪貳政之本也本強則精神折衝聞有偃息談笑而卻敵國之兵勝千里之難者矣乃至於身不能保而盜得殺之於朝安在其為陪貳乎故削音註喪去其大夫為當官失職者之鑒也

戊鄭虎牢楚公子貞帥師救鄭音註

向也曰虎牢今也曰鄭虎牢何不繫

之鄭者為天下城之也繫之鄭者為鄭戌之也是故楚丘不繫之衛綠陵不繫之杞梁山沙鹿不繫之晉皆非

一國之辭也。邢邵繫之紀彭城繫之宋，皆一國之辭也。○楚數救鄭矣。宣元年，蔣賈二年，鬬椒九年，子重十六年，楚子十七年，子重公子申皆不書。於是始書救鄭，以為晉悼復伯楚欲救而不能也。是故書救陳，見晉之終失陳；書救鄭，見楚之終失鄭云爾。

虎牢之地，城不繫鄭者，責在鄭也。戍而繫鄭者，罪諸侯也。曷為責鄭設險？所以守國有是險而不能設，犧牲玉帛待盟，境上使其民人不享土利，辛苦壅隘，無所底告。然後請成，故城不繫鄭者，責其不能有也。曷為罪諸侯？夫鄭人從楚，固云不義。然中國所以城之者，非欲斷荆楚之路為鄭蔽也。駐師扼險以逼之，爾至是伐而復戍焉，猶前志也。則可謂以義服之乎？故戍而繫鄭者，若曰：鄭國分地受諸天子，非列國所得專，所以罪諸侯也。聖人既以虎牢還繫於鄭，又書楚公子貞帥師救鄭，諸侯之罪益明矣。夫以救許楚所

以深罪諸侯不能保鄭肆其陵逼曾荆楚之不若也亦可謂深切著明也哉

公至自伐鄭

已靈王

十有一年

晉悼十一齊靈二十衛獻十五蔡景

亥十年

三十鄭簡四曹成十六陳哀七杞孝

五宋平十四秦景十五楚

共二十九吳壽夢二十四

春王正月

作三軍音註

此志三家分公室之始

三軍魯之舊也古者大國三軍次國二軍小國一軍魯侯封於曲阜地方數百里天下莫強焉及僖公時能復周公之宇而史克作頌其詩曰公車千乘說者以為大國之賦也又曰公徒三萬說者以為大國之

軍也故知三軍魯之舊爾然車而謂之公車則臣下無私乘也徒而謂之公徒則臣下無私民也若有侵伐諸卿更帥以出事畢則將歸於朝車復於甸甲散於丘卒還於邑將皆公家之臣兵皆公家之衆不相繫也文宣以來政在私門襄公幼弱季氏益張廢公室之三軍而三家各有其一季氏盡征焉而舊法亡矣是以謂之作其明年季孫宿救台遂入鄆又其後享范獻子而公臣不能具三耦民不屬公可知矣春秋書其作舍以見昭公失國定公無正而兵權不可去公室有天下國家者之所宜鑒也

夏四月四卜郊不從乃不郊

鄭公孫舍之帥師侵宋

公會晉侯宋公

平

衛侯

獻

曹伯

成

齊世子光莒子

比

邾

子

宣

滕子

成

薛伯

杞伯

小邾子

伐鄭

音註

此悼公三

駕之二

二

二

二

二

二

二

二

二

二

二

二

二

二

二

二

二

秋

七月

己未

同盟

于亳

城北

公至

自伐

鄭

音註

亳城鄭

地亳蒲

二

二

二

二

二

二

二

二

二

二

二

二

二

二

二

反落

楚

子

鄭

伯

伐

宋

二

二

二

二

二

二

二

二

二

二

二

二

二

二

二

二

二

二

二

二

二

盟

于亳

城北

鄭服

而

同盟

也

尋復

從楚

伐宋

故書

同

二

二

二

二

二

二

二

二

二

二

二

二

二

二

盟

見其

既同

而

又叛

也

既同

而

又叛

從

子展

之謀

欲

二

二

二

二

二

二

二

二

二

二

二

二

二

欽

晉師

而後

與之

也

故亳

之盟

其載

書曰

或間

茲命

二

二

二

二

二

二

二

二

二

二

二

二

二

二

二

明

神殛

之俾

失其

民隊

命亡

氏陪

其國

家雖

渝此

盟

二

二

二

二

二

二

二

二

二

二

二

二

二

二

二

而

不顧

也

噫

慢

鬼神

至

二

二

二

二

二

二

二

二

二

二

二

二

二

二

二

二

二

二

二

於

此極

而

盟猶

足恃

乎

二

二

二

二

二

二

二

二

二

二

二

二

二

二

二

二

二

二

二

二

音

註

二

二

二

二

二

二

二

二

二

二

二

二

二

二

二

二

二

二

二

二

二

二

二

二

公

會

晉侯

宋公

衛侯

曹伯

齊世

子光

莒子

邾子

滕子

薛

二

二

二

二

二

二

二

二

二

二

二

二

二

二

二

伯杞伯小邾子伐鄭會于蕭魚音註

蕭魚鄭地此悼公三駕之三○代鄭

會于蕭魚序績也○自是鄭不叛晉者二十四年

程氏曰會于蕭魚鄭又服而請會也不書鄭會謂其不可信也而晉悼公推至誠以待人信鄭不疑禮其

母而歸焉納斥侯禁侵掠遣叔肸告于諸侯而鄭自

此不便晉晉者二十四年至哉誠之能感人也自悼

公能謀於魏絳以息民聽於知武子而不與楚戰

三駕而楚不能與之爭雖城濮之績不越是矣

公至自會

楚人執鄭行人良霄音註

即伯有公孫輒之子

冬秦人伐晉

春秋傳卷二十一